



Sikuki Nuuk Harbour A/S
Issortarfimmut 1
3905 Nuussuaq

Allakkat ulluat: 08-11-2024
Suliap nr.: 2023-7487
Allaagaatip ilisarnaataa:
24549257

Postboks 1614
3900 Nuuk
+ (299) 34 50 00
Fax (+299) 34 54 10
E-mail: pan@nanoq.gl
www.naalakkersuisut.gl

Sikuki Nuuk Harbourip allilerneqarnissaanut ASN-mut akuersissuteqarneq, Kilisaatinut terminali



Imai

1	ASN Nuummi umiarsualivimmi Kilisaatinut terminalimik pilersitsinissamut ASN-mut akuersissuteqarneq.....	3
1.1	Aallaqqaasiut	3
1.2	Suliassamut siunertaq tunngaviusorlu	3
1.3	Inatsisit tunngaviusut	5
1.4	Akuersissutit akuersissuteqarnerillu allat.....	6
1.4.1	Pinngortitamut sunniutaasussanik nalilersuinerup akuersissuteqarfigineqarnera.....	6
1.4.2	Avatangiisinut akuersissuteqartussaataaneq pillugu immikkut	7
1.4.3	Akuersissutit akuersissuteqarnerillu annertunerusut.....	7
1.5	Pilersaarusiornermut tunngavissat.....	7
1.5.1	Kommunimut pilersaarut	7
1.5.2	Inuussutissarsiornerup ilusaa.....	8
1.5.3	Illoqarfimmik ineriartortitsineq.....	10
1.5.4	Eqqissisimatitsineq aamma sinerissami sumiiffik	10
1.6	Akuersissuteqarnerup killissalersorneqarnera	11
2	Suliassap allatullu periarfissat nassuiarneqarnerat	12
2.1	Suliassamut nassuiaat	12
2.1.1	Kilisaatinut terminalip aaqqissugaanera.....	13
2.2	Sanaartornerup immikkoortua	16
2.2.1	Immap iluani qaartiterinerit	19
2.2.2	Sanaartornerup immikkoortuani sunniinerit	20
2.3	Ingerlatsinerup immikkoortua.....	22
2.3.1	Ingerlatsinerup immikkoortuani sunniinerit	23
2.3.2	Matusineq	24
2.4	Allatut periarfissat.....	25
3	Suliassamut tunngavigisat	26
3.1	Suliassamut pingaarnertigut piffissamut pilersaarut	27
4	Atugassarititaasut ilaatillugit akuersissuteqarneq	28
4.1	Atugassarititaasut nalinginnaasut	28
4.2	Sanaartukkanut atugassarititaasut.....	29
4.3	Ingerlatsinermut atugassarititaasut.....	36
4.4	Matusinissamut atugassarititaasut	37

5	Atugassarititaasunut aalajangersarneqartunut tunngaviusut tunngavilersuutillu	38
6	Allaffissornikkut aalajangersakkat	41
6.1	Akuersissuteqarnerup atorunnaarnera.....	41
6.2	Akuersissuteqarnerup iluarsineqarnera	41
6.3	Peqqusissuteqarnerit	41
6.4	Avatangiisinik nakkutilliineq	42
6.5	Akuersissuteqarnerit tassunga attuumasut.....	42
7	Tamanut saqqummiussineq aamma naammagittaalliornissamut ilitersuut ..	43

1 ASN Nuummi umiarsualivimmi Kilisaatinut terminalimik pilersitsinissamut ASN-mut akuersissuteqarneq

1.1 Aallaqqaasiut

Nuummi umiarsualiviup Kilisaatinut terminalimik, containerinut terminalip pioreersup toqqaannartumik tallissutaatut pilersinneqartussamik, allilerneqarnissaanut ASN-mut akuersissuteqarneq sanatitsisumut Sikuki Nuuk Harbour A/S-imut matumuuna nalunaarutigineqarpoq.

ASN-mut akuersissuteqarneq *atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marts 2013-meersumi (ASN-nut nalunaarummi) § 19 naapertorlugu akuerineqarpoq.* Akuersissuteqarneq paasissutissat, naatsorsuinerit, annertussutsit nalilersuinerillu ASN-mut nassuiaammi 2024-07-03-meersumi tamanut saqqummiunneqartumi, tassungalu tusarniaanermut akissuteqaatini tiguneqartuni, allassimasut tunngavigalugit tunniunneqarpoq.

Akuersissuteqarneq, atugassarititaasut akuersissuteqarnermi matumani kapitali 4-mi allassimasut atuutsillugit, tunniunneqarpoq.

1.2 Suliassamut siunertaq tunngaviusorlu

Suliassami ilaatinneqarpoq Qeqertaq Avallermi umiarsualivimmi atortorissaarutit sumiiffimmi sanianiittumi, containerinut terminalip pioreersup kujataani, Kilisaatinut terminalimik allilerneqarnissaat. Allilerinermi, talittarfeqarfimmik nutaamik 300 meterimik, kilisaatinik avataasiutinik sullissinissamut umiarsualivimmi suliffissartaqartumik sanaartorneq siunissamilu ingerlatsineq, pineqarput. Suliassap inissisimaffissaa Ilusiliaq 1-imi takuneqarsinnaavoq.

Umiarsualivimmik allilerinissamik pisariaqartitsineq suliaqarnerit annertusiartornerisa malitsigaat. Tassani pingaartumik umiarsuit ilisimasassarsiortunik takornariartaatit, oqartussat umiarsuaasa ingerlataat aammalu siunertat allat, aalisarnermik inuussutissarsiortunut naatsorsuutigineqartut taamaaginnarlutik imaluunniit ukiuni qulikkaani aggersuni annikitsumik annertusilaarsinnaasoq naatsorsuutigineqarluni. Maannakkut kilisaatit Imapikkoortaatinut talittarfimmut pioreersumut, peqatigisaanik umiarsuarnit ilisimasassarsiortunik takornariartaatinit, oqartussat umiarsuaannit aammalu ingerlatassanut allanut umiarsuarnit atorineqartumut, talittarput. Piffissani immikkut ulapaarfiusuni kilisaatit imaluunniit umiarsuit takornariartaatit umiarsualivimmi talittarfimmut naleqqutinnginnerusumut

innersuunneqartarput, ilanngullugit Uteqattaarlutik pajuttaatinut talittarfik imaluunniit Imapikkoortaaŋnut talittarfitoq. Umiarsualivimmi ingerlatanut taakkununga tunngatillugu ingerlatat annertusiartuinnarneranni, aalisakkanit tunisassiat allallu nioqqutissat oqimaatsut tulaanneqarneranni ingerlateqqillugillu assartorneqarneranni, agguataarinerulluni, naapertuuttumik, isumannaatsumik suliariuminartumillu passunneqartarnissaat pisariaqalerpoq.

Sanaartugaq pingaarnertut kilisaatinut atorneqassaaq, kisianni tamatuma saniatigut, umiarsuup inissaqartitsinerulernera atorluarniarlugu, umiarsuarnut allaanerusunut atorneqarsinnaassalluni. Umiarsuarnut allaanerusunut taakkununga ilaatinneqarput oqartussat umiarsuaataat, ESANI-p ujaqqanik aserortikkanik eqqussuinerminut aammalu saviminikunik avammut annissuinerminut umiarsuaatai kiisalu ilaannikkut umiarsuit ilisimasassarsiortunik takornariartaatit 500-t angullugit ilaasoqartartut.

Kilisaatinut terminali pilersaarutigineqartoq siullermik pingaarnertullu kilisaatinut avataasiutinit qalerualinnik aalisakkanillu sunniuteqarluarnerusumik usigiaasalernermik malitseqassaaq. Tamatuma saniatigut taanna umiarsualiviup imartaani pioreersumi nunamilu taassumunga atasumi inissaqalersitsisussaavoq, tamatumani oqartussat umiarsuaasa, umiarsuit ilisimasassarsiortunik takornartaatit il.il. umiarsualivimmi allatigut angallannerannut inissaqartitsisarneq pitsanngorsarneqartussaalluni. Tamatuma saniatigut Imapikkoortaaŋnut talittarfiup aammalu containerinut terminalip akornanni aalisakkanik tunisassianik usingiarneqartunik assartuinerpassuit Nuummi aqqusinerni ingerlanneqartarunnaassapput, taakkua naatsorsuinerit naapertorlugit ukiumut siumut/utimullu 2.500-5.000 angullugit biiliniq aqqusaarneqartarlutik.



Ilusiliaq 1: Nunap assinga Nuummut takussutissiisoq. Kilisaatinut terminali aappaluttumik titartarlugu takutinneqarpoq

1.3 Inatsisit tunngaviusut

ASN-mut akuersissuteqarneq atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marts 2013-meersoq (ASN-nut nalunaarut) naapertorlugu nalunaarutigineqarpoq. Kilisaatinut terminali 300 meterit angullugit talittarfimmi takissuseqassaaq aammalu 1.350 ton sinnerlugit oqimaassusilinnit umiarsuarnit taliffigineqarsinnaassalluni. Taamaalilluni suliaasaq ASN-nut nalunaarummi ilanngussaq 1-imi immikkoortoq 9-mi pineqartunut ilaavoq: Imaatigut niuernermut umiarsualiviit kiisalu imaatigut aqqutit aammalu nunap iluani angalaarnissamut umiarsualiviit, angallavigineqarsinnaasut aammalu umiarsuarnit 1.350 tons sinnerlugu usisinnaasunit taliffigineqarsinnaasut.

Nuummi umiarsualivimmi Kilisaatinut terminaliliornissamut ASN-mut nassuiaat suliarineqassasoq pillugu, Nunalerinermut, Imminut Pilersornermut, Nukissiutinut Avatangiisinullu Naalakkersuisoq ASN-nut nalunaarummi § 5, imm. 1 aamma 2 naapertorlugu aalajangiivoq (ulloq 5. september 2023 ullulerneqartoq).

ASN-mut nassuiaat suliassami avatangiisinut sunniutaasussat annertuut tulleriissaartumik periaaseqarluni allaaserinninnermik imaqassaaq. ASN-mut nassuiaat suliassamut nassuiaat (Terms of Reference) akuerineqareersaq tunngavigalugu suliarineqassaaq. ASN-mut nassuiaammut siunertaavoq, suliassamut akuersissuteqartoqassanersoq, ilanngullugu atugassarititaasut suut akuersissuteqarnermut tunngavigineqassanersut, Naalakkersuisut aalajangiinissaminnut tamakkiisumik paasissutissiiviusunik tunngavissaqarnissaat, kiisalu allilerinissaq pisussaq pillugu innuttaasunut paasissutissiinissaq.

ASN-mut nassuiaat ulloq 5. juli 2024 aallarnerfigalugu ulloq 30. august 2024 tikillugu tamanut ammasumik tusarniaassutigineqarpoq, taamaalillutik tamat ASN-mut nassuiaammut oqaaseqaatissaminnek nassiussinissaminnut periarfissaqarsimallutik. Tusarniaanermut atatillugu Nuummi ulloq 13. august 2024 innuttaasunik ataatsimiititsineq ingerlanneqarpoq.

Tusarniaanermut atatillugu tusarniaanermut akissuteqaatinik tigusaqartoqanngilaq. Innuttaasunik ataatsimiititsineq tusarniaanermullu akissuteqaatit tunngavigalugit tusarniaaneq pillugu nalunaarusiaq (tusarniaanermut allakkiaq) suliarineqarpoq. Piffissaq tusarniaaffigineqartoq ASN-mut nassuiaatip allanngortinneqarnissaanut pissutissaqalersitsinngilaq.

1.4 Akuersissutit akuersissuteqarnerillu allat

ASN-mut akuersissuteqarneq manna aallaaviatigut avatangiisinut suliassaqrarfiup iluani ataatsimoortumik akuersissutitut atuuppoq, tassani avatangiisinut akuersissutit/akuersissuteqarnerit arlallit ilanngunneqarsimasinnaallutik. Kisianni akuersissutit/akuersissuteqarnerit allat ilanngunneqarsinnaanissaannut, Nunalerinermut, Imminut Pilersornermut, Nukissiutinut Avatangiisinullu Naalakkersuisoqrarfiup ASN-mut akuersissuteqarnermi pissutsinik maleruagassisinnaanissaannut paasissutissat pisariaqartut tiguneqarsimanissaat tunngavissaatinneqarpoq, takuuk immikkoortoq 1.4.2 aamma immikkoortoq 1.6.

1.4.1 Pinngortitamut sunniutaasussanik nalilersuinerup akuersissuteqarfigineqarnera

ASN-mut nassuiaammik *pinngortitamik illersuineq pillugu Inatsisartut inatsisaat nr. 29, 18. december 2003-meersumi (Pinngortitamik illersuinermut inatsit)* kapituli 14 naapertorlugu pinngortitamut sunniutaasussat ilanngunneqarput.

1.4.2 Avatangiisinut akuersissuteqartussaataaneq pillugu immikkut

ASN-nut nalunaarummi § 35, imm. 5 naapertorlugu, sanaartukkat suliassamut VVM-imut nalunaarut malillugu akuersissuteqarfigineqartumut ilaasimappata, sanaartukkanik *suliffeqarfiit mingutsitsivallaartut il.il. avatangiisinut tunngatillugu akuersissuteqarfigineqartarnerat pillugu Namminersornerullutik Oqartussat nalunaarutaat nr. 11, 20 august 2004-meersumi* (Avatangiisinut akuersissuteqartarnermut nalunaarut) ilanngussaq 1-imi allattorsimasunik avatangiisinut akuersissuteqarnissaq pillugu piumasaqaat atorunnaassaaq.

Taamaattoq tamatumani sanaartukkat taakkua, ASN-mut akuersissuteqarnermi ingerlatassanut taakkununga, atugassarititaasunut taamaanngippat immikkut avatangiisinut akuersissuteqarnermi piumasaqaatigineqartussaagaluartunut assingusunik, atugassarititaasunik piumasaqaateqartoqarsinnaalerlugu, ASN-mut nassuiaammik suliarineqarsimanissaat/nassuiarneqarsimanissaat pisariaqarpoq. Nassuiaanerni sapinngisamik annertunerpaamik immikkoortut Avatangiisinut akuersissuteqartarnermut nalunaarummut ilanngussaq 2-mi allassimasut sumiissusersineqassapput.

1.4.3 Akuersissutit akuersissuteqarnerillu annertunerusut

ASN-mut akuersissuteqarnermi matumani akuersissutitaqartumi, ASN-rnut nalunaarummi § 27 naapertorlugu sanatitsisoq inatsisit allat naapertorlugit akuersissutinik akuersissuteqarnerinillu attuumassutilinnik allanik piniarnissamik pisussaaffeerutsinneqanngilaq.

1.5 Pilersaarusiornermut tunngavissat

1.5.1 Kommunimut pilersaarut

Suliassap sumiiffia Nuup illoqarfiata avataatungaani illoqarfiup ilaani Nuussuarmi, Nuussuup nuuata kujammut kangiani Qeqertaq Awallermi inissisimavoq. Qeqertaq Avalleq 2020-2032-mut Sermersuumut Kommunimut pilersaarummi sumiiffittut inuussutissarsiorfissatut toqqarneqarpoq.

Sumiiffiup ilaa 2B2 – Nuummi Containerinut umiarsualivik

Suliassap sumiiffia sumiiffiup ilaata 2B2-p – *Nuummi Containerinut umiarsualivik*, iluani inissisimavoq, *kommunimut pilersaarummut tapiliussamut 2B2-5-imi Inuussutissarsiorfissaq Qeqertat*, atatillugu 2021-mi martsimi toqqarneqarluni.

Sumiiffiup ilaanut siunertaavoq inuussutissarsiorfissamut umiarsualiveqarfissamullu atugassiinissaq. Atorneqarfissaa aalajangersarneqarpoq umiarsualivimmut siunertaqartut, talittarfittaqarluni nunniugartaqarlunilu, terminalimik allaffissornernullu suliffissaqarluni,

umiarsualivimmi atortorissaarutitaqarluni aammalu inuussutissarsiutit umiarsualivimmut qanittumiinnissamik pisariaqartitsisut, ilanngullugit inissiiveqarnerup assartuussinerullu iluanni suliffeqarfiit, toqqorsiviit, sannaviit allallu aalisarnermut suliareqqiisarfiit suliffissuit.

Ataatsimut isigalugu taamaalilluni naliliisoqarpoq, nutaamik Kilisaatinut terminaliliorinissaq *2020-2032-mut Sermersuumut Kommunimut pilersaarummi* pilersaarusiortnermut naapertuuttoq aammalu Kilisaatinut terminali illoqarfimmut pilersaarummi siunertanut atornerqarfissaanullu naapertuuttoq.

Sikuki Qeqertaq Avalliup kippasissortaanut, suliassap sumiiffissaata inissisimaffianut, nunaminertamik atuisinnaatitaanernik akuerineqarsimavoq. Suliassap nunaminertarpiaa taamaalilluni Nuummi umiarsualivimmi atortorissaarutini allilerinermi matumani atugassiissuteqarfigineqareerpoq.

1.5.2 Inuussutissarsiortnerup ilusaa

Nuuk Kalaallit Nunaanni inuussutissarsiortnikkut qitiutinneqarpoq, tamatumanilu inuussutissarsiutit oqimaannerusut assartuussinermut, pilersitsiortnermut illuliortiternermullu atasut annertuumik pineqarput. Taamatut inissisimanera tunngavissinniarlugu Kommuneqarfik Sermersooq Nuummi timmisartoqarfimmiit aammalu Qeqertani, Kilisaatinut terminalip nutaap pilersinneqarfissaani, inuussutissarsiortnermut umiarsualivimmut nutaamut inuussutissarsiortnermi aqqutissaq atugassiissutigaa (takuuk Ilusiliaq 2).



Ilusiliaq 2: 2020-2032-mut Sermersooq Kommunimut pilersaarummit Nuummi inuussutissarsiuqarfik

Inuussutissarsiuqarfimmiipput pilersuinnermut, assartuussinermut, suliffissuaqarnermut assassornermullu suliffeqarfiit, inuussutissarsiornermut umiarsualivittaassaq aammalu Pukuffimmi inuussutissarsiorfik pioreersoq aallaavigalugit sumiiffimmi katersuussimasut. Inuussutissarsiuqarfimmi aamma ilaatinneqarpoq Qeqertani siunissami immiinissaq, tamannalu nunaminertanik inuussutissarsiornermut atorneqartussanik arlalinnik qulakkeerisussaavoq aammalu inuussutissarsiuqarfimmi nukittorsaasussaalluni.

Naliliisoqarpoq Kilisaatinut terminalimik nutaamik pilersitsineq nunaminertanik atugassiinernut taakkununga tamakkiisumik naapertuuttussaasoq, taamaalillunilu Nuummi pilersaarusiornikkut ineriartortitsinermik tunngavissiiisussaasoq.

1.5.3 Illoqarfimmik ineriartortitsineq

Nuummi innuttaasut amerliartuinnarneranni inissianik pisariaqartitsilernissaq naammassiniarlugu, Kommuneqarfik Sermersuup 2020-2032-mut *Kommunimut pilersaarutaani* 2032 tikillugu piffissanut pilersaarusiortiusussanut siunissami illoqarfiup ineriartortinneqarfissai toqqarneqarput. Sumiiffiit illoqarfimmik ineriartortitsiviusussat taakkua arlaalluunniit suliassap sumiiffianut ajoqutaanngillat.

Suliassamut sanilliullugu isigissagaanni, tamatuma kingunerisaanik aalisarneq allallu inuussutissarsiortnermi ingerlanneqartut, piffissap sivilisunerusup ingerlanerani naapertuuttumik ataatsimoortinneqartussaapput, tamannalumi aamma kommunimut pilersaarummut pingaarnertut tunngaviuvoq. Illoqarfimmut pilersaarusiortnermi Containerinut terminalip eqqaa aammalu Kilisaatinut terminali siunnersuutigineqartoq, suliffissuarnut umiarsualivimmut attuumassutilinnut aammalu umiarsualivimmut siunertanut atorineqartussatut pilersaarutigineqarput, tamannalu Kilisaatinut terminalip inissisimaffissaanut naapertuuppoq.

Suliassami aqqusernit aqquataasussat, Qeqertaq Avalliup umiarsualivimmut atatillugu inuussutissarsiortfissatut ataatsimoortutut siunissami illoqarfiup ineriartortinnissaanut arlalinniit kissaatigineqartoq mianeralugu, pilersaarusiortneqarput suliarineqassallutillu.

Tassani ilaatinneqarput umiarsualivimmi sumiiffiit immikkoortut A-p, B-p, C-p aamma E-p allilerneqarnissaannut pilersaarutit, takuuk *Kommunimut pilersaarummut tapiliussa* 2B2-5. Tassani umiarsualivimmut atatillugu talittarfeqarfittut inuussutissarsiortnermullu atorineqarsinnaasumik imartap immernissaa ajornarunnaarsinneqarpoq.

Kilisaatinut terminaliliorinissaq taamaalilluni pilersaarummut tunngaviusumut naapertuuppoq.

1.5.4 Eqqissisimatitsineq aamma sinerissami sumiiffik

Nunami namminermi imaluunniit nunani tamalaani eqqissisimatitsinernik, suliassamit kalluarneqartussanik imaluunniit sunnerneqartussanik, soqanngilaq. Kalaallit Nunaanni pinngortitamik illersuinnermut inatsit malillugu nunami il.il. illoqarfiup nunaqarfiullu avataanni sinerissamiit 100 meterinik ungasissusillip iluani allanngortiterisoqaqqusaanngilaq.

Suliassap sumiiffia illoqarfiup iluaniippoq, taamaattumik taamatut killilersuineq suliassap sumiiffianut atuunnani. Sumiiffik allatigut teknikkeqarfinnut piareersagaasutut isikkoqarpoq, tassami umiarsualiviup sumiiffiani immiisoqarsimammat, aammalu qaarsuit tassaniikkaluartut nalimmatsinneqarsimallutik.

1.6 Akuersissuteqarnerup killissalersorneqarnera

ASN-mut akuersissuteqarnermi Sikuki Nuuk Harbour-ip Kilisaatinut terminalimik allilerneqarnerani sanaartornissaq ingerlatsinissarlu pineqartunut ilaatinneqarput.

ASN-mut akuersissuteqarnermi ASN-mut nassuiaammi suliassamut nassuiaat aammalu paasissutissiinerit, naatsorsuinerit, annertussutsit nalilersuinerillu VVM-imut nassuiaammi nassuiarneqartut, aallaavigineqarput. Suliassaq annertuumik annertusitinneqassappat imaluunniit annertuumik allanngortinneqassappat – taamaalillunilu ASN-mut nassuiaammi allassimanngitsunik nalilersorneqarsimanngitsunillu – sanatitsisoq Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmut tamatumunnga akuersissuteqarnissamik qinnuteqassaaq. Sanaartornermik suliaqarnerit suliassaaqqaartumi suliniutissanut annertunerusunut imaluunniit allanngortitsisunut attuumassutillit taamaattut, Nunalerinermut, Imminut Pilersornermut, Nukissiutinut Avatangiisinullu Naalakkersuisoq (ASN-rnut nalunaarummi § 19 naapertorlugu) tamatumunnga allaganngorlugu akuersissuteqaaqqaanngippat, taakkua aallartinneqaaqqaanngillat.

Suliassamut allannguutit inatsisit allat malillugit akuersissummik imaluunniit akuersissuteqarnermik piumasaqaateqarfiuppata, ASN-mut nalunaarummi matumani maleruagassiivigineqanngitsunik, taamatut allanngortitsinissaq aatsaat inatsisit attuumassutillit pissutsinut maleruagassiiviusut naapertorlugit, tamatumunnga akuersissummik/akuersissuteqarnermik nalunaaruteqarfigineqareerpata aatsaat taakkua pisinnaapput.

2 Suliassap allatullu periarfissat nassuiarneqarnerat

Sanaartornermut ingerlatsinermullu immikkoortuni suliassamut nassuiaammut aammalu avatangiisinut annertuumik sunniutaasussanut nassuiaammut tulliuttunut, ASN-mut nassuiaammi suliassamut nassuiaat aamma avatangiisinik nalilersuineq aallaavigineqarput, peqatigisaanillu ASN-mik akuersissuteqarnermi atugassarititaasunut tunngavissaliilluni.

2.1 Suliassamut nassuiaat

Kilisaatinut terminali tassaavoq kilisaatinut talittarfeqarfissaq 300 meterit angullugit takissusilik, Qeqertaq Avallermi Nuup Umiarsualiviani pilersinneqartussatut pilersaarutigineqartoq. Sanaartugassaq umiarsualiviup kujataatungaani containerinut terminalip pioreersup toqqaannartumik tallissutaatut pilersinneqartussatut pilersaarutigineqarpoq. Tininngananilu ulinngatinnagu talittarfik sinerlugu 300 meterisut takissusilimmi imaq 17 meterit angullugit itissuseqarpoq aammalu 200 meterisut takissusilimmi 13 meterinik itissuseqarluni. Takuuk Ilusiliaq 3-mi Kilisaatinut terminalip inissisimaffissaa.

Sanaartukkap nunami nunaminertaa, talittarfiup saqqaaniit nunaminertami qalliusersukkami tunorlerpaamut ungasissusaa uuttorlugu, 75 m missaannik atitussuseqarpoq. Tassunga ilanngutissapput aqqusernit aqqutaasussat. Takuuk matuma kinguliani Ilusiliaq 4.




Ilusiliaq 3: Umiarsualivik pioreersoq, containerinut terminali aammalu Kilisaatinut terminali pilersaarutigineqartoq (tankeqarfusinnaasoq ilanngullugu).

2.1.1 Kilisaatinut terminalip aaqqissugaanera

Kilisaatinut terminali nunaminertai ilanngullugit pingaartumik kilisaatit avataasiutit angallannerannik atuutereersumik sullissiviussapput, tassani ilaatinneqarlutik umiarsuit 1.350 tons sinnerlugu useqarsinnaasut.

Talittarfeqarfiup aaqqissuussaanera imatut aaqqissuunneqassaaq, aammalu taamatuttaaq matuma kinguliani Ilusiliaq 4-mi takutinneqarluni:

- Talittarfiup sinaani qaninnermiissaaq talittarfimmi aqputissaq 22 meterisut atitussuseqartoq imaqartinneqartussaannngitsorlu, umiarsuit talittut sullinnissaannut atorneqartussaq (ilusiliami aappaluttoq).
- Talittarfeqarfimmi 200 meterinut siullernut reefer-eqarfissaq 50 meterisut silissuseqarpoq, tassa imaappoq containerinik inissiiivissaq passussivissarlu ammasoq (ilusiliami sungaartoq).
- Talittarfeqarfimmi 100 meterini kingullerni sumiiffik immerneqarsimavoq, aallaqqaammut oqartussat umiarsuaannit, ESANI-p umiarsuaannit pisunilu immikkut ittuni umiarsuarnit ilisimasassarsiorluni takornariartaatinit, taliffigineqarsinnaasussaq.
- Talittarfimmi aqputissarpiaq aalaakkaasumik qalliuserlugu suliarineqassaaq, umiarsualiviup nunaminertaa tunorleq ujaraaqqanik aalaakkaasuunngitsumik qalliuteqassalluni (ilusiliami tungujortoq.)



Ilusiliaq 4: Kilisaatinut terminalimut ilusilersuinissamut pilersaarut

Nunaminertami tunorlermi (55 m missaannik atitussuseqartoq) qullernut napparutinit, reefer-tavle-nut inissamik aammalu reefer-containerinik passussinissamut inissamik atugassiisoqarpoq.

Suliassap sumiiffianut aqqusineqarpoq aqqutaasussamik 12 aamma 18 meterinik atitussusilimmik. Tamatuma saniatigut containerinut terminalip tungaanut 15 meterisut atitussusilimmik aqquteqalernissaa pilersaarutigineqarpoq (aqqusernit Ilusiliaq 4-mi qasertumik qalipaaserlugit takutinneqarput).

Inersuaq kiassagaanngitsoq

Talittarfiup tunorpiaa transformerstationimut inissaq aammalu siunissami inersuassamut atisalersorfittalimmut, kaffisortarfittalimmut il.il. kiisalu p-nut inissanut atugassiissutigineqarpoq.

Napparutini qaammaqqusersuisoqassaaq aammalu talittarfiup sinaanut sarfaliisoqassalluni aammalu inersuarmi atortorissaarutininik pilersuinissamut piareersaasoqassalluni.

Suliassap sumiiffianut imermik pilersuineramik pilersitsisoqassaaq aammalu inersuarmi atortorissaarutiniit kuuffimmut piareersaasoqassalluni.

Inersuaq imminermi suliassamut ilaatinneqanngilaq.

Nunami sarfaq

Siunissami talittarfiup sumiiffiata avataani innaallagiamut attaveqaasersuutitut attavilimmik nunami sarfalersuummik pilersitsinissamut piareersaasoqassaaq. Sarfalersuut taamaattoq Kilisaatinut terminalimi aammalu containerinut terminalimi umiarsuit nunamiit sarfamik pilersuisinnaassaaq, tamatumani najukkami ikuallaanermiit gassinik aniatitsineq aammalu umiarsualiveqarfimmiit nipiliorneq annikillisinneqarsinnaassapput.

Nunami sarfamut atortorissaarutilersuineq suliassami ilaatinneqanngilaq.

Umiarsuarnut ikummatissamik pilersuineq

Iikummatissamik pilersuinermut tunngatillugu aaqqiissutissanut siunnersuutit marluk isumaliutersuutigineqarput. Siulleg tassaaq umiarsuit Inussummi uuliaasivinniit imartaatigoorlutik ikummatissamik assartuisut aqutigalugit orsersortarneq, tassunga kilisaatit talittassallutik aammalu umiarsuarmiit umiarsuarmut uuliamik orsersortassallutik ("ship-to-ship-bunkring"). Aaqqiissutissanut siunnersuutip aappaa tassaaq, kilisaatinut talittarfiup kujataatungaani isuani uuliatankimik nutaamik uuliaasiviliinissaaq aammalu talittarfiup nunaminertaata ataatigoortumik ruujorilersuinissaaq. Tankeqarfiusinnaasup inissisimaffissaa Ilusiliaq 5-imi takutinneqarpoq.

Tankeqarfimmik pilersitsinissamut suliassamiissaaq tanki 8.000 m³-nik imaqsinnaasooq. Tankip diameteria 28 meteriussaaq aammalu 14 meterinik portussuseqassalluni.

Tanki immikkoortumi siullermi pilersinneqassanngilaq. Immikkoortumi siullermi tankimiit talittarfiup sinaani siunissami puilasuliassanut ledninginik assaassisoqassaaq.

Tanki kingusinnerusukkut pilersinneqarsinnaavoq.



Ilusiliaq 5: Tankeqarfiusinnaasup inissisimaffissaa aammalu Kilisaatinut terminalip kujammuinnaq isuani avatangiisai qaninnerpaat. Ningalimmi ilorlermi tankitarpiaa takutinneqarpoq. Ningaliup tulliani eqqaa kaajallallugu qarmagassaaq, uuliakoortoqassappat tamatuminnnga imaqarsinnaasoq, takutinneqarpoq. Ningalimmi avallermi sarfap sakkortuup attaveqaatillu kabelit ungasissusissaat titartarneqarpoq.

2.2 Sanaartornerup immikkoortua

Teknikkinik ilusilersuinerit, sanaartormik suliaqarnerit il.il., aaqqiissutissat containerinut terminaliliornermi atorneqartut assigisorujussuussagaat naatsorsuutigineqarpoq. Taamaattoq sumiiffiup nalimmassarneqareersimanera aammalu teknikkikkut atortussanut piareersareersimanera, allaassutaasussaavoq. Tassa imaappoq immap qulaani qaarsunik qaartitserisoqartussaannngilaq imaluunniit annikitsuinnarmik qaartiterisoqartussaalluni.

Tunisassiorfik suliassa qarfiup sumiffianiittutuaasoq tassaavoq, immap iluani qaartiterinerniit qaarsuneersut seqummakuinit sequtserivik. Suliassap ingerlanneqarnissaanut atortussat allat tamarmik Nuummi tunisassiorfimmit akuerisamit pissarsiarineqassapput. Atortussani ilassutigineqartuni taakkunani

ilaapput assersuutigalugu ujaqquerivimmiit qaarsuneersut sequtsikkat, betonngi, asfalti.

Sanaartornermik suliaqarnerit nunamiit imaaniillu ingerlanneqassapput. Sanaartornermi ingerlatassanut assigiinngitsunut kiisalu atortussat aammalu sulisut atortorissaarutissaasa assigiinngitsut inissinnissaannut nunataa pioreersoq atorneqassaaq. Immap tungaaniit immap naqqaniittut nippusimanngitsut piiarneqassapput, qaartiterinissamut putuliorluni qillerisoqassaaq, immap naqqani qaartiterisoqassaaq, allanillu suliaqartoqassalluni.

Containerinut terminali pioreersoq sanaartugassap tamarmi ingerlanerani taliffigineqartassaaq, tamannalu entreprenør-ri suliaqartuusup aammalu Royal Arctic Line-p (RAL) akornanni sakkortuumik ingerlaavartumillu ataqatigiissarinnikkut qulakkeerneqassalluni. Assersuutigalugu piffissani Containerinut terminalimut qaninnerpaani immap iluani suliaqarnerit ingerlanneqarfianni, piffissat ilaanni RAL-ip suliaqarneri sanaartortuusumit utaqqimaarneqartariaqartarnissaat naatsorsuutigineqartariaqarpoq.

Pingaarnertigut sanaartornermik suliaqarnerni makkua ingerlanneqassapput: Kimmuinnaq talittarfiup sinaaniittussat talittarfiup iigartassai ikkussorneqassapput, tamatuma kingorna nunamiittortaani immiisoqassalluni. Umiarsualiviup nunaminertaa tunuaniittoq innaallagiamut, imermut kuuffinnullu atortulersuuserneqassaaq.

Piffissaq sanaartorfiusussaq tamarmiisoq ukiunik marlunnik sivisussuseqassasooq naatsorsuutigineqarpoq.

Sanaartornermi ingerlatassatut naatsorsuutigineqarsinaasuni taamaalilluni ilaatinneqarput:

1. Talittarfiup iigartaasa saviminertaannut/talittarfiup sinaanut immap naqqani 300 meterisut takissusilimmik aammalu 4 – 5,5 meterisut itissusilinnik itersaliorneq.
2. Talittarfiup iigartaasa saviminertaannik inissiineq aammalu talittarfiup tungaani imartaanilu kussinerup immerneqarnera kiisalu kisat inissitsiternerat.
3. Talittarfiup sumiiffianiittut nippusimanngitsut nalimmassarneqarnerat
4. Talittarfiup nunaminertaanut pilersuinernut aqqusersuineq, tassa imaappooq innaallagiamut, imermut, eqqiluisaarnermut kiisalu ikummatissamut.
5. Talittarfiup nunaminertaannik qajannaarsuutitut betonnginik qallersuutininik ujaqqersuineq
6. Qammaqqusersuineq aammalu sullissinissamut atortulersuineq
7. Aqqusinernik aqquasussanik, ungalunik isaaffissamillu pilersitsineq

Imm. 1. aamma 2: Talittarfiup iigartaasa saviminertaannik/talittarfiup sinaata ikkussorneqarnerat.

Talittarfiup iigartaasa saviminertassarsui kaattarlugit kappussorneqassanngillat. Tamatumunnga taarsiullugu immap naqqani itersaliorluni qaartiterisoqassaaq, talittarfiup iigartaasa saviminertassarsui tassunga inissineqassallutik, aammalu illuatungaanni tamaginni itersaq immerneqassalluni. Aallarniutaasumik immap naqqani nippusimanngitsut kivitsisinik/nivaatamik piiarneqassapput. Tamatuma kingorna qaarsumi itersaliorluni qaartiterisoqassaaq.

Qaartiterinermeersut talittarfiup eqqaani kivitsisinik/ nivaatanik ingerlaavartumik katersorneqartassapput, tassani immikkoortiterneqassallutik sequtserneqassallutillu. Qaartiterinermeersut sapinngisamik talittarfiup iigartaasa saviminertaasa sinaanni itersaliap sananeqarnerani atoqqinneqassapput.

Qaarsumernit sequtserneqarnerat maskiinat taakkununnga aaqqissuussat atorlugit pissaaq.

Kussinerup aammalu kussinerup nunamiittortaani talittarfiup immerneqarnissaannut avataaneersunik atorussanik pissarsisoqartariaqarpoq. Immiissutissat ujaqqurevimmit kommunimit akuerisamit piiarneqassapput.

Imm. 3, 4 aamma 5. Talittarfiup nunaminertaa, ledninngit, kiisalu qajannaarsorneqarnera

Talittarfiup nunaminertaata manissunngortinnissaa taamaallaat atorunut seqummaalasunut tunngassuteqarpoq, aammalu suliassaq entreprenørmaskiinat nalinginnaasut atorlugit suliarineqassaaq. Pilersuinermit aqquersuusersuinissaq assaanikkut annertunerpaatigut pissasoq naatsorsuutigineqarpoq.

Nunami qaartiterinissaq pisariaqartinneqalersinnaavoq, taanna Kalaallit Nunaanni illuliorluni sanaartorlunilu suliaqarnermi maskiinat atorneqartartut assigalugit qillerutit angallattakkat minnerusut atorlugit ingerlanneqassaaq.

Naatsorsuutigineqarpoq ledninngit annertunerpaartaat allallu ilusiliinerit assanneqarsinnaasut. Taamaattoq imermik pilersuinermit tunngasortaannut, kiisalu inaarutaasumik aaqqiissutaasussaq, inissisimaffiit ilaat apeqquutaallutik, qaartiterinissaq pisariaqarsinnaavoq.

Ataatsimoortumik allanngortitsinani missiliuineq aallaavigalugu suliassap sumiiffiani nunami qaarsunik 2.650 m^3 -inik qaartiterinissaq pisariaqartinneqarsinnaassaaq.

Talittarfiup nunaminertai qajannaarsorlugit, maskiinanik assartuutinik atorneqarsinnaanngorlugit sananeqassapput.

Imm. 6 aamma 7. Sullissivissat aamma aqquernit atorneqartussat

Pilersuinerit nunaminertamut anngutsinnerisigut inersuarmi atortorissarusuisoqarsinnaanngorlugu piareersaasoqassaaq. Illutaa 1.000 m^2 angullugu toqqavia angissuseqassasoq naatsorsuutigineqarpoq. Tassani

nalinginnaasumik illuliornissaq pineqarpoq, immikkut annertussutsinik imaluunniit atortussanik pisariaqartitsiviunani, aammalu qaartiterutissanik imaluunniit ikuallajasunik passussinertaqartussaanani.


Napparutit, sarfamut imermullu ikkuffissat immikkoortumik toqqaveqartillugit pilersinneqassapput aammalu annertuumik ineriigaassallutik ikkussugassat pilersuiffinnut ikkutiinnarneqartussat.

Aqqusernit aqputaasussat, angissusaannut sanaartoriaatsimullu tunngatillugu, Nuummi kommuunip aqquserngitut nalinginnaasumik suliarineqassapput, aammalu Kommuuneqarfik Sermersuup aqqusinniornermut innersuussutai naapertorlugit ingerlanneqassallutik.

2.2.1 Immap iluani qaartiterinerit

Talittarfiup iigartassaannik ikkussuinissamut, talittarfiup iigartaasa saviminertaasa, talittarfiup sinaaniittussat, inissinnissaannut kussinernik qaartiterinertut taagorneqartut pisariaqalertussaapput. Tamanna talittarfiup saqqata takissusaa tamaat, tassalu 300 meterit angullugit, suliarineqassaaq.

Kussinerup qaartiterneqarnissaanut pisariaqartumut sanimut kipillugu titartagaq Ilusiliaq 6-mi takuneqarsinnaavoq. Taanna kussineq sisamanik teqeqqulimmi aappaluttumi takutinneqarpoq. Taanna maannakkut immap naqqata ataani 4 – 5,5 meterit missaannik itissusilinngorlugu suliarineqassaaq.



Ilusiliaq 6: Sanimut kipillugu titartagaq talittarfiup iigartassaasa sukumiisortaannik takutitsisoq. Talittarfiup iigartassaasa inissiffissaanik kussinernik qanoq qaartiterisoqassanersoq, aappaluttumik siniligaavoq.

2.2.2 Sanaartornerup immikkoortuani sunniinerit

Tamatuma kingorna suliaassap sanaartornerup immikkoortuani avatangiisinut sunniutissai annertunerpaat nassuiarneqarput.

Nunami pinngortitaq pissutsillu isigineqarsinnaasut

Sanaartornerup immikkoortuani sumiiffik sanaartorfiusoq sanaartorfittut isikkoqassaaq. Suliassap sumiiffia inissianit umiarsualivimmut isikkivilinnit ersimmat, sumiiffinnit taakkunannga suliassaq arlaatigut sunniisussaavoq.

Ulloq unnuarlu suliassap sumiiffiani sanaartorluni sulisoqartussaavoq, taamaattumik avatangiisut sunnerneqartussaallutik, ilaatigut qaammaqqutinit sunniineq arlaatigut ilaasussaalluni. Ullumikkut containerinut terminalimut, avannamut suliassap sumiiffianut killittumut, tassanngaaniillu annertuumik angallattoqareerpoq. Taamaattumik sanaartornerup immikkoortuani sunniinissaq annikitsutut nalilerneqarpoq.

Nipiliorneq


Ulloq unnuarlu sanaartornermi suliartoqartassaaq, taamaattoq ingerlatassat immikkut nipiliorfitsiviusut (assersuutigalugu qaarsunik sequtserineq immaqalu nunami qaartiterineq) taamaallaat suliffiup nalinginnaasup iluani ingerlanneqassapput.

Ineqarfiit qaninnerpaat, assersuutigalugu qaarsunik sequtserinerit ingerlanneqarpata 55 dB(A) angullugu nipiliornermit sunnerneqarsinnaapput. Nalinginnaasumik inissiat suliffiup nalinginnaasup iluani 50 dB(A) nipitussuseralugu nipiliornermik sunnerneqarnerat akuersarneqarsinnaasutut isigineqarpoq.

Suliffiup nalinginnaasup avataani sanaartorfiusumi ingerlatassat inissianut 45 dB(A) angullugu nipiliornerit sinniinerannik malitseqarsinnaapput. Nalinginnaasumik inissiat 40 dB(A) nipitussuseralugu nipiliornermit sunnerneqarnerat akuersarneqarsinnaasutut isigineqarpoq, taamaattumik 45 dB(A) nipitussuseralugu sunniineq tamatuminnga annertuneruvoq. VVM-imut nassuiaammik naliliisoqarpoq nalinginnaasumik suliffiup iluani nipiliorneq akunnattumik sunniinerusoq aammalu suliffiup nalinginnaasup iluani nipiliorneq annikitsumik sunniinerusoq.

Immap iluani nipiliorneq

Naatsorsuutigineqarpoq piffissap qaammatit 24-t angullugit sivilissusillip ingerlanerani immap naqqani qaartiterinerit 70-it missai ingerlanneqassasut. Ulloq unnuarlu qaartiterineq annerpaamik ataaseq ingerlanneqartassaaq. Immap iluani nipiliornerup siaruarnissaa killilersimaarniarlugu naatsorsuutigineqarpoq sumiiffiup qaartiteriviusussap eqqaani qaleriinnik puaasartitsilluni assiaqutilersuisoqassasoq.



Ilusiliaq 7: Tusaasaqatigiinnut LF-inut, tassaasunut imaani uumasut miluumasut (qipoqqat, tikaagullik aamma tikaagulliusaaq) sumiiffik sunniiviusinnaasoq, tassani sunniiviusussa annersaalluni. Sumiiffik PTS-inut (ataavartumik tusaasinnaassutsip ajoqusernera) aamma TTS-inut (qaangiuteqqittussamik tusaasinnaassutsip ajoquserneqarnera) takutinneqarpoq.

Ilusiliaq 7-mi takuneqarsinnaasutut, sumiiffimmit qaartiteriviusumit 1.400 m tikillugit ungasissusilimmi imaani uumasut miluumasut sunnertianerpaat sunnerneqarsinnaapput. Qaartiterisoqannginnerani sumiiffiup sunniiviusussap iluani imaani uumasunik miluumasunik uumasoaqarnera misissorneqaqqaassaaq. Taamaattoqarpat qaartiterinerit kinguartinneqassapput. Tamanna tunngavigalugu naliliisoqarpoq immap iluani qaartiterinerit imaani uumasunut miluumasunik aalisakkanullu pingaaruteqanngitsumik annikitsumik sunniisussaasut.

Qaartiterinernut atatillugu akuutissanik arlalinnik kuutsitsisoqartussaavoq, ilanngullugu kvælstof-inik akullit. ASN-mut nassuiaammi naliliisoqarpoq, kuutsitsineq imaani avatangiisinut sunniinermik malitseqassanngitsoq imaluunniit sunniinermik pingaaruteqanngitsumik malitseqassasoq.

Angallanneq

Sanaartornerup immikkoortuani Quassussuarmi ujaqquarivimmiit ujaqqanik qaartitikkaniq sequtsikkanik annertuunik biiliniq agguissisoqartassaaq. Suliassap

sumiiffianut ujaqqat qaartiterinermeersut sequtsikkat 150.000 m³ missaannik imaluunniit 260.000 ton missaannik annertussusillit biilnik aggiunneqartassapput. Ujaqqanik qaartiterinermeersunik biilnik aggiussineq ulloq unnuarlu ingerlanneqassaaq, tassani taamaattoq piffissami angallaffiunerpaaffiusumi (nal.7:30-8:30 aamma nal.15:00-17.00) ujaqqanik assartuisoqartassanani. Aggvaqatigiissillugu ulloq unnuarlu siumut/utimullu assartuussinerit 52-iussapput. Biilnik kuisakkamik lastilinnik biilertarnissaq tassani pineqarmat, tamatuma aqqusineri atorineqartussani malittaasunilu aqqutigineqarsinnaanerit angallannerullu isumannaatsuunera sunnertussaavai. Angallannermiit avatangiisinut sunniinissaq tamarmiisoq, ASN-mut nassuiaammi annikitsutut nalilerneqarpoq.

Sunniinerit allat

Eqqagassanut, imikoorummut, silap pissusaanut silaannaallu pitsaassusaanut, aatsitassanut atuinnermullu atatillugu avatangiisinut sunniinissaq ASN-mut nassuiaammi annikitsutut, sunniuteqartussaangitsutut imaluunniit pingaaruteqanngitsutut nalilerneqarput

2.3 Ingerlatsinerup immikkoortua

Ingerlatsinerup immikkoortuani kilisaatit Kilisaatinut terminalimut talittassapput usiminnillu usigiartassallutik – pingaartumik raajanik qerisunik allanillu aalisakkanit tunisassianik karsiniittunik. Kilisaatit peqatigisaanik umiarsuup pilersorneqarneranut usilersortassapput orsersortassallutillu.

Naatsorsuutigineqarpoq ukiumut kilisaatit talinneri 180-it missai passunneqartassasut. Tamanna maannakkut kilisaatit Angallannermi umiarsualivimmut talittartunut naapertuuppoq, ilanngullugu pingaartumik Imapikkoortaatinut talittarfik.

Kilisaatinut terminalimi pilersaarutigineqartumi aalisakkat qaleruallillu containerinut suliareqqiiiviusussanut toqqaannartumik sunniuteqarluartumik usingiarneqartassapput, containerinut terminalikkoortumik avammut nioqqutigineqartussatut imaluunniit najukkami suliareqqinneqartussatut.

Umiarsuup nammineq kraniinik umiarsuarmit talittarfimmut usigiaasoqartassaaq, tassanngaaniit gaffeltrucks-inik reefer-containerinut reefer-eqarfimmi inissisimasunut assartorneqassallutik. Umiarsuit nammineq kranii, kraninik angallattakkanik minnerusunik tapertalerneqarsinnaassapput. Taamaaqataanik pilersuutissat talittarfiup qaavanukaanneqartassapput aammalu umiarsuup kraniinik umiarsuarmut amorneqartassallutik.

Pisassiissutit inuussutissarsionermullu tunngasut aallaavigalugit naatsorsuutigineqarpoq kilisaatit talittarnerat ukioq kingullertut suliaqarfiutigissasut, tassa imaappoq ukiumut talittarnerit 140-180 missaat, imaluunniit qaammammut talittarnerit 13 aamma 15 akornanni. Kilisaatit

talittarnerat ulloq unnuarlu pisinnaasarpog, aammalu kilisaatit nalunaaquttap akunnerini 24-niit 48-nut talinngasarnerat nalinginnaasuvoq.

Oqartussat umiarsuai nikerartumik akulikissusilimmik Nuummi talittarput, kisianni ukiuunerani piffissani sivilisunerusuni amerlanertigut Nuummi talinngasarlutik. Oqartussat umiarsuai siunissami pingaartumik Angallannermi umiarsualivimmut talittaannassapput, tassani Issittumi Sakkutooqarfiup qullersaqarfianut kiisalu ingerlatassanut allanut qaninnerpaamiittarlutik. Aasaanerani ukiaanerani immikkut ulapaarfiusuni oqartussat umiarsuaasa, umiarsualiviup avataani kisarsimanissaminut taarsiullugu, qaammammut 2-5-riarlutik Kilisaatinut terminalimut talissinnaasarnissaat naatsorsuutigineqarpoq. Taakkua piffissaq talinngasarnerat suliaassat umiarsuarmit isumagineqartut malillugit nikerartarpoq.

ESANI-p ujaraaqqanik eqqussuinnermut saviminikunillu avammut annissuinnermut umiarsuai 2023-mi Nuummi 10-riarlutik talinngapput. Talinnganerit nalunaaquttap akunnerisa 24-t aamma 72-it akornanni sivilisussuseqartarput.

Umiarsuit ilisimasassarsiorluni takornariartitsisartut Imarpikkoortaatitut talittarfimmi pioereesumi imaluunniit Angallannermi umiarsualivimmi nalinginnaasumik talittassapput, tassanngaaniit ilaasut toqqaannartumik illoqarfiliarsinnaallutik. Ilaannikkut, inissanik ajornartorsiuteqarnermi taakkua Kilisaatinut terminalimi talissinnaasassapput. Taakkua nalinginnaasumik nalunaaquttap akunnerisa 9 amma 16 akornanni talinngasarput.

Ingerlatsineq imikoorummik kuutsitsinermik kinguneqartussaangilaq. Kommuni aqqissuussineranut eqqagassat killilimmik annertussusillit tunniunneqartarput. Aamma umiarsuit ilisimasassarsiorluni takornariartitsisartut motoorilinnik, nipiliornikkut kilisaatinut sanilliunneqarsinnaasunik ikiorteqlarlutik nammineq nukissiamik pilersornertik isumagaat.

2.3.1 Ingerlatsinerup immikkoortuani sunniinerit

Nunami pinngortitaq pissutsillu isigineqarsinnaasut

Suliaasap sumiiffia umiarsualiveqarfiup ilaatut, talittarfimmi containerinut umiarsuarnullu teknikkeqarfittut, isikkoqartussaavoq. Unnuakkut piffissani Kilisaatinut terminalimi ingerlataqartoqarnerani, arlaatigut qaammaqqutit sunniisartussaapput. Takusassiat suliarineqarput aammalu Kilisaatinut terminalimit isigisanit sunniinissaq ASN-mut nassuiaammi annikitsutut nalilerneqarpoq.

Tankeqarfik pilersinneqassappat, taanna Qeqertaq Avallermi nunami malunnaatilittut isikkoqartussaavoq, tassami uuliamut tanki illoqarfimmi sumiiffinnit arlalinnit, pingaartumillu immap tungaaniit, ersittussaammat.

Tankeqarfimmit sunniinissaq ASN-mut nassuiaammi annertuutut nalilerneqarpoq.

Nipiliorneq

Ingerlatsinerup immikkoortuani ilaatigut umiarsuarni atortunit motorilinnit, umiarsuarni talittarfimmilu kraninit, saviminikunik usingiaanermi/usilersornermi, talittarfimmi gaffeltrucks-inik ingerlaarnernit aammalu containerinik passussinermit nipiliortitsisoqartartussaavoq. ASN-mut nassuiaammi tamanna naatsorsorneqarpoq, ulloq unnuarlu 40-45 dB(A) nipitussuseralugu inissianut sineriak sinerlugu inissisimasunut sunniisussaasoq. Taamaattumik unnuakkut 40 dB(A) killissaliunneqartoq qaangerneqartartussaavoq. Ingerlatsinerup immikkoortuani nipiliorneq, avatangiisinut akunnattumik sunniinermik malitseqartussatut VVM-imut nassuiaammi nalilerneqarpoq.

Angallanneq

Kilisaatinut terminaliliornerup malitsigisaanik aalisakkanik tunisassianik assartuussineq, maannakkut pisartunut sanilliullugu, annertuumik annertussusilimmik annikillisussaavoq. Paarlattuanik umiarsuit ilisimasassarsiorluni takornariartitsisartut Kilisaatinut terminalimut talinniartillugit, ilaasunut atatillugu angallattoqarnerulertussaavoq. Pissutsit marluk taakkua arlaatigut annertussusilimmik imminnut nalimmassartussaapput, taamaattumik Kilisaatinut terminalimik ingerlatsinermi angallannerup sunniinissaa ASN-mut nassuiaammi annikitsutut nalilerneqarluni.

Imaani pinngortitaq

Ingerlatsinerup immikkoortuani uuliamik orsersortoqartartussaavoq, tamannalu ajutoornermik malitseqarsinnaavoq kuutsitsisoornermik malitseqartumik. Suleriaatsit upalungaarsimanermullu pilersaarutit arlaqarput, orsersornermi malinneqartussanik, tamatullu kuutsitsisoortoqassagaluarpas tamatumunnga atatillugu ungalunissaanut salinnissaanullu atortoqarluni. ASN-mut nassuiaammi naliliisoqarpoq suliaassap piviusunngortinneqarnera imaani pinngortitamut annikitsumik sunniinermik malitseqartussaasoq.

Sunniinerit allat

Eqqagassanut, imikoorummut, silap pissusaanut silaannaallu pitsaassusaanut, aatsitassanut atuinermullu atatillugu avatangiisinut sunniinissaq ASN-mut nassuiaammi annikitsutut, sunniuteqartussaannngitsutut imaluunniit pingaaruteqanngitsutut nalilerneqarput

2.3.2 Matusineq

Sanaartugassaq ataavartussaq matumani pineqarpoq, aammalu suliaassamut nassuiaat Kilisaatinut terminalip peerneqarnissaanut pilersaarutinik imaqqanngilaq.

2.4 Allatut periarfissat

Kilisaatinut terminalip inissiivissaanut periarfissat allat misissorneqarsimanngillat, tassami containerinut terminalimut aammalu kommuunimi inuussutissarsiortut angallataannut nangissutigalugu inissinneqarpat tamanna pissusissamisoortutut naapertuuttutullu isikkoqarmat. Orsersortarnissamut allatut periaasissat, tankeqarfimmit pioreersumiit Kilisaatinut terminalimut biilini tankilinni assartuisarnermik iluseqartut, misissorneqarsimapput, kisianni allatut periarfissaq taanna toqqarneqarsimanngilaq.

Umiarsuit talittarfimmi talinngasut pilersornissaannut kingusinnerusukkut nunami sarfaliisoqarsinnaaneranut Kilisaatinut terminali piareersagaavoq, tamatumanilu avatangiisinik nipiliornermik sunniineq annikillisinneqartussaavoq. Taamaattoq nunami sarfalersuutissaq suliassap ilaatut toqqarneqarsimanngilaq.

3 Suliassamut tunngavigisat

Sanatitsisup suliassamut tunngavigisai tassaapput immikkut suliniuteqarnerit/aallaavigineqartut, sanatitsisup suliassap pilersinneqarneranut ingerlanneqalerneranullu atatillugu atussallugit pisussaaffigisai. Tunngavigisat taakkua ASN-mut nassuiaammi suliassap sanatitsisumit nassuiarneqarnerani takuneqarsinnaapput. Tunngavigisat pingaarnerit takussutissiami matuma kingulianiittumi issuarneqarput.

Takussutissiaq 1: Avatangiisinik nalilersuinerit ingerlanneqartumut tunngavigisat aammalu ASN-mik akuersissuteqarnerit tunniunneqartumut tunngavigineqartut.

Qulequtaq	Tunngavigisaq	ASN-mut nassuiaammi immikkoortoq
Kilisaatinut terminali	Talittarfiup sinnaa annerpaamik 300 meterisut takissuseqartillugu pilersinneqassaaq. Naatsorsuutigineqarpoq sanaartugassaq tamarmi Sikuki Nuuk Harbour A/S-imit pigineqassasoq ingerlanneqassasorlu. Naatsorsuutigineqarpoq kilisaatit kiisalu oqartussat umiarsuaasa, ESANI-p umiarsuaasa aamma umiarsuit ilisimasassarsiorluni takomariartitsisartut Nuummi umiarsualivimmit pioereersumit (Imarpikkoortaatinut talittarfik allallu) talittartut, siunissami Kilisaatinut terminalip ingerlanneqalernerani amerlissanngitsut.	Immikkoortoq 4 Suliassamut nassuiaat
Talittarfiliorneq	Talittarfeqarfik siminnik iigartalerlugu pilersinneqassaaq. Savimernit iigassai kaattarlugu kappussuunneqassanngillat. Savimernit iigassai kussinermi qaartiterneqartumi inissinneqassapput aammalu sinai tamarmik immerneqassallutik.	Immikkoortoq 4.4. Sanaartornerup immikkoortua
Qaartiterineq	Immap naqqani qaartiterisoqassaaq, tassani immap naqqani talittarfiup sinnaa sinnerlugu kussineq 4-5,5 meteri qaartiterneqassalluni. Nunami pilersuinerit ledning-inut (imermut, eqqiluisaarnermut, innaallagiamut, ikummatissamut) kabelit assaannissaannut qaartiterinissaq pisariaqartinneqalersinnaavoq	Immikkoortoq 4.4 Sanaartornerup immikkoortua Immikkoortoq 4.5 Immap iluani qaartiterinerit
Orsersornissamut uuliamut tanki	Kingusinnerusukku Kilisaatinut terminalimi kilisaatinut ikummatissamut tankeqarfik 8.000 m ³ pilersinneqarsinnaavoq	Immikkoortoq 4.3.3 tankeqarfimmit nutaamit pilersuineq
Sanaartornermik suliaqarnermit nipiliorneq	Immap naqqani qaartiterinerit immap iluani nipiliortitsisussaapput. Qaartiterinerit sunniinerit annikillisinnaarlugit iluarsiissutaasussanik iliuuseqarluni qaartiterinerit ingerlanneqassapput – puaasartitsilluni assiaqutit marloqiusat, nalunaquttap akunnerini 24-ni qaartitsineq ataasiinnaq, qimaatitsisussanik nipiliorneq atorlugu, qaartiterinissaq il.il. sioqqullugit imaani uumasunik miluumasunik alapernaarsuineq. Nunami nipiliortussat tassaasussaapput ujaqqanik qaartiterneqartunik sequtserineq, ujaqqanik	Immikkoortoq 4.5.2 Pitsaaliuilluni iliuusissaq Immikkoortoq 7.2.3 Sanaartornerup immikkoortuani sunniutaasussat

Qulequtaq	Tunngavigisaq	ASN-mut nassuiaammi immikkoortoq
	qaartiterineq, talittarfeqarfimmi immiineq il.il. Naatsorsuutigineqarpoq, illunut nipinut malussarissunut qaninnerpaanut, 600-700 meterit missaannik ungasissusilinnut, 55 dB(A) annertussuseralugu nipiliortoqarsinnaasoq. Tamatumani naatsorsuutigineqarpoq ingerlatassat tamarmik ataatsikkut ingerlanneqassasut, ilanngullugu talittarfimmi ujaqqanik qaartitikkaniq sequtserineq. Ingerlatassat immikkut nipiliortussat taamaallaat nalinginnaasumik suliffiup iluani pisartussaapput.	
Angallanneq	Naatsorsuutigineqarpoq sioqqat ujaqqallu Quassussuaarmi ujaqqerivimmeersut talittarfeqarfiup immerneqarneranut atorneqassasut. Ujaqqanik qaartitikkaniq agguissineq piffissami angallaffiunerpaasumi ingerlanneqartassanngilaq.	Immikkoortoq 8.3 Sanaartornerup immikkoortuani sunniutaasussat
Eqqagassat	Igitassat Kommuuneqarfik Sermersuumut kommuunimut eqqagassalerinermut malittarisassat naapertorlugit katersorneqassapput passunneqassallutillu.	Immikkoortoq 10 Eqqagassat
Imikoorut	Imikoorut kommuunimi imikoorummut malittarisassat atuuttut naapertorlugit passunneqassaaq.	Immikkoortoq 11 Imikoorut
Akuutissat avatangiisinut navianartut	Naatsorsuutigineqarpoq akuutissat navianartut, ilanngullugit ikummatissat, isumannaatsumik puussani akuerisani uninngasuutigineqassasut, taamaalilluni kuutsitsisoorsinnaanerup seerisoqarsinnaaneratalu aarlerinaateqarnera annikillisinneqassalluni.	Immikkoortoq 11.3 Sanaartornerup immikkoortuani sunniutaasussat
Uuliakoorneq	Sikuki Nuuk Harbour ingerlatsinerup immikkoortuani uuliakoornermik assiaqutsiinissamut katersuinissamullu upalungaarsimasoqarpoq. Naatsorsuutigineqarpoq Sikukip kuutsitsisoornernut upalungaarsimasui immikkoortoq 9.4.1-imi nassuiarneqartut, aamma assiaqutsersuutitaqarlutillu allanik milluaasussanik atortutaqartut, annertunerusumik uuliakoortoqartillugu assiaqutsiinermut atorneqarsinnaasunik. Naatsorsuutigineqarpoq uuliakoornissamut upalungaarsimasut aamma sanaartornerup immikkoortuani sulissasut.	Immikkoortoq 9.4.1 Uuliamik maangaannartitsineq

3.1 Suliassamut pingaarnertigut piffissamut pilersaarut

Kilisaatinut terminalimik sanaartorluni suliaqarneq ukiut marluk angullugit sivilissuseqartussaavoq (martsip novembarillu akornanni pingaarnertigut suliaqartoqarluni suliaqarfiusussani marlunni).

4 Atugassarititaasut ilaatillugit akuersissuteqarneq

Kapitali ASN-mik akuersissuteqarnermi atugassarititaasunik imaqarpoq. Kapitali atugassarititaasut nalinginnaasunut, sanaartornermut ingerlatsinermullu immikkoortunut atugassarititaasunut aammalu sanaartornermut matusinermut atugassarititaasunut, aggulunneqarpoq. Kapitali 5-imi atugassarititaasut tunngavilersorneqarput.

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfiup ASN-mik akuersissuteqarnermi matumani atugassarititaasut naammassineqarnerat nakkutigissavaa.

ASN-mik akuersissuteqarnermi suliassamut ASN-mut nassuiaammi nassuiarneqartumut sanaartorneq ingerlatsinerlu kisimik pineqartunut ilaatinneqarput. Ingerlatassat akuersissuteqarfigineqareersut saniatigut allanngortitsisoqassappat, Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfik tamanna pitinnagu tamatumunnga qinnuteqarfigineqassaaq.

4.1 Atugassarititaasut nalinginnaasut

- 1 Kalaallisut danskisullu ASN-mik akuersissuteqarnerup allannera ataaseq sanaartorfimmi pissarsiarineqarsinnaassaaq. Sanaartornerup ingerlatsinerullu immikkoortuini sanaartugassami ingerlatassanut akisussaasuusut tamarmik ASN-mik akuersissuteqarnerup imarisai pillugit ilisimatinneqassapput aammalu akuersissuteqarnermi atugassarititaasut malissallugit.
- 2 Suliassamut nassuiaat iluarsisaq aammalu najoqqutassat allat allannguutissanut attuumassuteqartut Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmut nassiunneqassapput, tamatuma kingorna allannguutit akuersissuteqarfigineqartussaataitanersut nalilersorneqassalluni. Oqartussat allaganngorlugu akuersitinnagit allannguutit aallarteqqusaanngillat.
- 3 Sanatitsisup minnerpaamik sanaartugassamik suliaqarnerup allartinnissaa qaammatinik 2-nik sioqqullugu Kilisaatinut terminalip suliarineqarnissaanut pilersaarut inaarutaasumik aalajangersagaasoq Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmut saqqummiutissavaa. Pilersaarut minnerpaamik makkuninnga imaqassaaq:
 - a. Sanaartornerup immikkoortuanut piffissamut pilersaarut, ilanngullugu sanaartornermi ingerlatassanut ataasiakkaanut, kiisalu Kilisaatinut terminalip ingerlanneqalernissaanut piffissamut pilersaarut
 - b. Talittarfiup aamma Kilisaatinut terminalip nunaminertaanut tamarmiusumut inaarutaasumik annertussusiliinerit

- c. Suliassap sumiiffiani qajannaarsuinerup nassuiarneqarnera, ilanngullugu isumalluutini atuneq

4.2 Sanaartukkanut atugassarititaasut

Atugassarititaasut nalinginnaasut

- 4 Illorsuartaanut suliassamut pilersaarut sanatitsisup Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut saqqummiutissavaa. Pilersaarut illorsuup sananeqarnissaata kissaatigineqalinnginnerani minnerpaamik qaammatit 4-t sioqqullugit saqqummiunneqassaaq.

Suliassaq ASN-mi nalilersorneqartoq annertuunik allannguuteqanngitsoq Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfiup nalilersoreerpagu, aatsaat illorsuaq pilersinneqarsinnaalissaaq.

- 5 Nunami sarfalersuutini atortorissaarutinillu pilersitsinermi sanatitsisup suliassamut pilersaarut Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut saqqummiutissavaa. Pilersaarut nunami sarfalersuutit pilersinneqarnissaannik kissaatigineqalinnginnermi minnerpaamik qaammatit sioqqullugit saqqummiunneqassaaq.

Suliassaq ASN-mi nalilersorneqartoq annertuunik allannguuteqanngitsoq, Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfiup nalilersoreerpagu aatsaat nunami sarfalersuutit pilersinneqarqusaalissapput.

Avatangiisinut pilersaarut

- 6 Sanaartorluni suliaqarnerup aallartinnginnerani sanatitsisoq suliassamut avatangiisinut pilersaarummik suliaqassaaq. Avatangiisinut pilersaarummi nassuiarneqassapput:
 - a) Uuliamik tunisassiani, akuutissani uumaatsuni nalinginnaasumillu akuutissani avatangiisiniittuunngitsuni kuuttoqarnissaanut sillimaniarnermi maleruagassat, ilanngullugit uninngasuuteqarnermut tunngasut aammalu sillimaniarnermi maleruagassat, ajutoornermut kuutsitsisoornermullu atatillugu mingutsitsinermit pitsaaliuisussat killiliisussallu aallartinneqartussat.
 - b) Akuutissani avatangiisiniittuunngitsuni passussinissamut pilersaarut, ilanngullugit sanaartornerup immikkoortuani ikummatissaq, uuliamik tunisassiat, akuutissat uumaatsut, qaartiterutissat, eqqagassat aamma

imikoorut. Passussinerup atugassarititaasunut 12-15-imut
naapertuuttumik pinissaa, pilersaarummi qulakkeerneqassaaq.

- c) Ujaqqanik sequtserivik, ilanngullugu inissisimaffissaa, kiisalu
*suliffeqarfiit mingutsivallaartut il.il. avatangiisinut tunngatillugu
akuersissuteqarfigineqartarnerat pillugu Namminersornerullutik
Oqartussat nalunaarutaat nr. 11, 20 august 2004-meersumi,*
sanaartukkap ilanngussaq 1-imu *-mik nalunaaqutserlugu allassimaffiani,
maleruagassat qanoq sanaartukkami naammassineqarnersut.
- d) Suliassami sulisussanut sulisut atortorissaarutissaasa inissisimaffissaat
aaqqissuussaanerallu.
- e) Ujaqqat qaartiterinermeersut, ujaqqat sequtserneqartut toqqorsiviisa
allallu sioqqanut, ujaqqanut isumalluutinullu toqqorsiviit
inissisimaffissaat nassuiarneqarnerallu.

Avatangiisinut pilersaarut Nunalerinermut, Imminut Pilersornermut,
Nukissiutitut Avatangiisinullu Naalakkersuisoqarfimmut
akuersissuteqarfigineqartussanngorlugu nassiunneqassaaq.
Naalakkersuisoqarfiup avatangiisinut pilersaarut
akuersissuteqarfigeriinngippagu, sanaartorluni suliaqarneq
aallarteqqusaanngilaq.

Ujaqqanik sequtserivik

- 7 Ujaqqanik sequtserivimmik immikkoortiterivimmillu ingerlatsinermi
aserfallatsaaliuinerimiillu uulia igitassaq, kiisalu mingutsinneqarsimasut
katersorneqartut, uuliakoornertit akuutissallu uumaatsut
katersorneqarnerannut atorneqartut, atugassarititaasuni 12-15-imu
innersuussinertut passunneqassapput.
- 8 Atortussiassat, akuutissat atorneqartussat, akuutissat uumaatsut
ikummatissat il.il. toqqorsivinniitinneqartut aammalu ujaqqanik
sequtseriviup ingerlanneqarneranit igitassat, atugassarititaasuni 12-15-imu
innersuussinertut passunneqassapput.
- 9 Ingerlatassat pujoralatsitsisussat, pujoralaat suussusersiuminaatsut
annikillisussanngorlugit ingerlanneqassapput, ilanngullugu pisariaqartumik
imerterisoqartassaaq imaluunniit allatut pitsaaliuilluni periaatsinik
atuisoqassalluni.
- 10 Ingerlatsinermi allattuiffimmi allattuisoqartassaaq, allanneqartassallutik:
 - a. Suliaqarfimmi tunisassiornermut piffissaq ingerlatsiviusoq ulluilu

- b. Tunisassiornerup nalunaarsorneqarnera, imaqqortussusaa nalilerlugu usit aggiunneqartut aallarunneqartullu nalunaarsorneqarlutik.
- c. Suliaqarfiit ingerlanneqarnerannut uuliamik atuinerup nalunaarsorneqarnera.
- d. Ingerlatsinerup akornuteqarsimanerata imaluunniit ajutoorsimanerit ulluinik nalunaarsuineq, ilanngullugit uuliakoorneq kiisalu tamatumunnga atatillugu iliuseqarnerit/iliusissat ingerlanneqartut allanneqarlutik.

11 Suliaqarfimmi nammineq misissuisarnerit makkua ingerlanneqassapput:

- a. Ullut tamaasa uuliamut tankit uninngasuutigineqartut il.il. takullugit misissuineq.
- b. Ullut tamaasa tunisassiornermut assartuussinermullu atortut takullugit misissuineq.

Akuutissanik uumaatsunik, uuliamik tunisassianik, eqqagassanik imikoornerinillu sanaartornerup immikkoortuani passussinissaq

- 12 Ikummatissanut tankeqarfiusinnaasut allat iluleriinnik iigaqassapput. Taamaanngippat tankeqarfik kuserfimmi imaluunniit ameraasami ussiitsumi, minnerpaamik tankip anginerup imaattut annertussusilimmik katersuivittaqartumi, inissinneqassaaq. Kuutsitsisuunnginnissamut isumannaarisussaq sila qanoq ikkaluarpalluunniit atorsinnaassaaq. Tankeqarfik toqqissumik toqqavilimmi inissinneqassaaq aammalu biilini aporneqarsinnaannginnissaa qulakkeerneqassalluni. Tankeqarfik ingerlaannartumik matusartumik atortoqartinneqassaaq utsersornermullu kalerrisaaruteqartinneqassalluni.
- 13 Imerpalasut akuutissanik avatangiisinut navianartumik imallit, ilanngullugit saffiugassat oqimaatsut, akuutissat uumaatsut, ikuallajasut, uulia, atortut qaarsinnaasut imaluunniit qinngornernik ulorianartunik akullit, katersorneqassapput aammalu imikoorummut ilanngullugit kuutsinneqaqqusaanatik. Imerpalasut taamaattut igitassatut navianartutut suliarineqassapput aammalu qulisamiitinneqassallutik aamma silarlunneranut illersorneqarlutik kuserfimmi imaluunniit ameraasami ussiitsumi, minnerpaamik tankip anginerup imaattut annertussusilimmik katersuivittaqartumi, ussiitsumik pooqartinneqassallutik. Sunik imaqarnerisut puuni ersarissumik allassimassaaq. Puuisa biilini aporneqarsinnaannginnissaa qulakkeerneqassalluni. Puui kommunip eqqagassalerinermut malittarisassai naapertorlugit iginneqassapput.
- 14 Igitassat tamarmik maleruagassat atuuttut, ilanngullugit kommuunip eqqagassalerinermut malittarisassai, naapertorlugit katersorneqassapput iginneqassallutillu.

- 15 Sumiiffinni kuutsitsisoornissaq aarlerinaateqartuni, katersuinissamut atortut pisariaqartut aamma containerit katersuiffiusussat sumiiffimmi tassaniitineqassapput. Kuutsittoorneqartut katersorneqassapput aammalu sapinngisamik eqqarsaatigineqartutut atorneqassallutik. Issoq mingutsinneqartoq aammalu kuutsittoorneqartut, siunertatut atorneqarsinnaanngitsut, maleruagassat atuuttut, ilanngullugit kommuunip eqqagassalerinermut malittarisassai, naapertorlugit igitassatut navianartutut katersorneqassapput, passunneqassapput uninngasuutigineqassallutillu.

Imikoorut

- 16 Imikoorut tankini katersorneqassaaq aammalu kinnernik milluaammik iginneqassalluni aammalu Kommuuneqarfik Sermersuumi imikoorummut maleruagassat naapertorlugit kuutsinneqassalluni.

Kilisaatit ikummatissaannut uulianut tanki

- 17 Kilisaatinut ikummatissamut uuliatankiliinissamut suliassamut pilersaarut sanatitsisup uuliatankip pilersinneqarnissaanik kissaateqarneq minnerpaamik qaammatinik 4-nik sioqqullugu Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut saqqummiutissavaa.

Suliassaq ASN-mi nalilersorneqartoq annertuunik allannguuteqanngitsoq Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfik naliliippat, aatsaat uuliatanki pilersinneqaqquusaalissaaq.

- 18 Uuliatanki annerpaamik 8.000 m³-inik imaqarsinnaassaaq aammalu maleruagassat teknikkinullu peqqussutit atuuttut naapertorlugit pilersinneqassalluni ingerlanneqassallunilu.
- 19 Uuliatankip eqqaani uuliatankip imarisaanik imaqarsinnaasumik kaajallallugu qarmaliisoqassaaq. Qarmaq ataani qaarsumi toqqavilerlugu betonngimik sananeqassaaq. Betonngi avatangiisinut qajannaatsuliaq atorneqassaaq. Tankip ungaluugaasa iluanni nuna ujaraaqqaanik qallerlugu makittarissarneqassaaq aammalu qarmami kuuffissiap ammartartup tungaanut uinganilerlugu suliarineqassalluni, tassanngaaniit sialunnit aattuniillu imeq tankip ungaluiniit kuulluni paqqersinnaassalluni.
- 20 Tankip ungaluugai naqqani ussissarneqassapput iigaalu “Concrete Canvas”-imik betonngimik ameraasalerneqassallutik. Qaleriinneri marraasersorneqassapput qinnerilu sukaterneqassallutik. Qarmagaq kaajallallugu ungerutissianik ungalulersorneqassaaq. Tankip ungaluugaannut matorsuakkut paarnaartartukkut majuartarfikkoorluni isertoqartassaaq.
- 21 Uuliatanki kaajallallugu 50 meterinik isumannaallisaaviliisoqassaaq.

- 22 Tanki qasertumik qalipaartilinnik qalipanneqassaaq
- 23 Tanki naammassillugu sananeqareerpat, atorneqalinnginnerani imermik naqitsinera misilerarneqassaaq.
- 24 Uuliatankimiit maqitsisarfinnut ruujorit aqqusersuutit ruujoritut sisattut ataatsimoortunngorlugit svejserneqassapput, plastikkimik manngertumik qallerlugit illersuuserneqassallutik. Ruujorit aqqusersuutit talliffissaqartillugit naaliffissaqartillugillu ikkussorneqassapput.
- 25 Angallatinut uuliamik maqitsinissamut illumi minnerusumi imaarsaatitut ittumik naqitsineqarnerulersitsisartumik ikkussuisoqassappat, naqitsinera nakkutigineqartuaannartassaaq, aammalu ernalernerani naqitsineerutissagalarpat ingerlatsinermi sulisut kalerrisaarnissaannut kalerrisaarutini ikkussuisoqassaaq.
- 26 Maqitsisarfinmiit angallammut uuliamik maqitsineq slangit atorlugit pisassaaq.

Nunami qaartiterinerit

- 27 Nunami qaartiterinernik suliaqalinnginnermi sanatitsisoq qaartiterinermut pisussanut pilersaarummik suliaqassaaq, ilaatigut qaartiterutissat suussusaannik annertussusaannillu nassuiaaviusumik, Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut akuersissuteqarfigineqartussanngorlugu nassiunneqartussamik.
- 28 ANFO qaartiterinernut atorneqaqqusaanngilaq.

Immap iluani qaartiterinerit

- 29 Qaartiterinerit ingerlanneqalinnginneranni qaartiterinissamut pisussanut pilersaarut suliarineqassaaq, taannalu Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut akuersissuteqarfigineqartussanngorlugu nassiunneqassaaq.
- 30 Eurodyn-3000 (ASN-mut nassuiaammi avatangiisinut sunniinissamut tunngavissaatinneqartoq) saniatigut qaartiterutissanik allanik atuisoqassappat, qaartiterutissanit allaanerusunit taakkunanga avatangiisinut sunniinerit Eurodyn-3000-miit qaffasinnerunngitsut, uppersaat nassiunneqassaaq.
- 31 Qaartiterinerit tamaasa qillerlugit putuliat annerpaamik 28-t qillerneqaqqusaapput.
- 32 Putut qaartitsivissat annerpaamik Eurodyn-3000-nik 20 kg-nik immeqqusaapput.

- 33 Putut qaartitsivissat tamarmik immikkut, putup takissusaanut diameterianullu naammattumik ujaqqanik sequtsikkanik nipikillisaaserneqassapput/poorsimatinneqassapput
- 34 Puaasartitsilluni assiaqutit qaleriit ikkunneqassapput. Puaasartitsilluni assiaqutit ilorpiaasa radius-iat najukkami pissutsit aallaavigalugit naleqqussarneqassaaq.
- 35 Puaasartitsilluni assiaqutit ilorpiaasa silarlersaasalu imminnut ungasissusaat minnerpaamik immap itissusaatut annertussuseqassaaq
- 36 Assiaqutit tamarmik immikkut minnerpaamik $1 \text{ m}^3/(\text{min-m})$ silaannaqartinneqassapput.
- 37 Puaasartitsilluni assiaqutit 20-30 cm-isut ungasissusilinnik sulluaralersorneqassapput.
- 38 Qillerlugit putuliassanik qillerinerit nalaanni aammalu qaartiterinermut atatillugu nipinik sakkukillisaatit atorineqartuaannassapput
- 39 Qaartitsinissaq nalunaaquttap akunnerata affaanik sioqqullugu imaani uumasunut miluumasunut sumiiffik sunniiviususaaq alapernaarsorneqassaaq. Sumiiffimmi arfeqarpat, qaartitsinissaq unitsinneqassaaq. Alapernaarsuineq inummit suliassap sumiiffiata qanitaani arfernik alapernaarsuineq qanoq ingerlanneqassanersoq ilisimannittumit ingerlanneqassaaq, ilanngullugit atorut suut atorineqartussaanersut, aalasut suut maluginiarneqassanersut kiisalu alapernaarsuineq tamakkiisuutillugu qanoq ingerlanneqassanersoq.
- 40 Qaartitsinermut siullermut atatillugu, qaartitsinermit avatangiisinut sunniinissaq ASN-mut nassuiaammi nassuiarneqartoq nalilerneqartorlu qaangerlugu annertussuseqanngitsoq, uppersaasoqassaaq. Qaartitsinermit avatangiisinut sunniinissaq ASN-mut nassuiaammi nassuiarneqartoq nalilersorneqartorlu qaangerlugu annertussuseqarsimappat, iluarsiisoqassaaq, tamatumalu kingorna qaartitsinerit uppersaaserneqassapput, taamaalilluni qaartitsinerit arlaalluunniit ASN-mut nassuiaammi nassuiarneqartumit nalilersorneqartumillu annertunerusumik avatangiisinut sunniinermik malitseqanngitsoq, qulakkeerneqassalluni.

Nunami nipiliorneq

- 41 Sanaartornerup immikkoortuani nalinginnaasumik suliffiusartup avataani ingerlatassanut atatillugu, inissiat 40 dB(A)-mit nipitunermik nipiliornermit sunnerneqannginnissaat qulakkeerneqassaaq. Tamanna pisinnaavoq ingerlatassat aqqissuunnerisigut imaluunniit ingerlatassat nipiliortut assiaqutsersornerisigut. Sanaartornerup immikkoortuani nalinginnaasumik suliffiusartup avataani inissiat 40 dB(A)-mit nipitunermik nipiliorfigineqannginnissaat qanoq qulakkeerneqassanersoq, pilersaarut,

sanaartormik suliaqarnerup aallartinnginnerani Nunalerinermut, Imminut Pilersormut, Nukissiutitut Avatangiisinullu Naalakkersuisoqarfimmut nassuineqassaaq.

- 42 Sanatitsisup piumaffigineqarnermini nipiliornernik uuttortaalluni imaluunniit naatsorsuilluni, nipiliornernut killissat qaangerneqarsimanngitsut, uppersarsassavaa. Nipiliornernik uuttortaanerit piffissani sanaartormi ingerlatat annertunerpaaffianni ingerlanneqassapput. Suliffeqarfinnit avataaniit nipiliornernik uuttortaanernut malittarisassat nutaanerpaat malillugit uuttortaanerit ingerlanneqassapput.

Immap iluani nipiliorneq

- 43 Talittarfiup iigartaasa saviminertai kaattarlugit kappussorneqaqqusaanngillat. Talittarfiup iigartaannik saviminertalersuinerit periaaseq allanngortinneqassappat, ilanngullugu kaattarlugit kappussornissai imaluunniit sajukulaartitsinissaq, sanatitsisup nipiliornernut nunap assinga nalilersuinerillu iluarsisat Nunalerinermut, Imminut Pilersormut, Nukissiutitut Avatangiisinullu Naalakkersuisoqarfimmut nassuutissavai.

ASN-mi nalilersorneqartoq annertuunik allannguuteqanngitsaq Nunalerinermut, Imminut Pilersormut, Nukissiutitut Avatangiisinullu Naalakkersuisoqarfik nalileereerpat aatsaat periaatsip allanngortinnissaa ingerlanneqassaaq.

Qaammaqqusersuineq

- 44 Sullivik aqqissuunneqassaaq qaammaqqusersuutit inngianartussaajunnaarlugit imaluunniit allatut avatangiisit akornuserneqartussaajunnaarlugit. Qulleq najugaqarfiit tunutsillugit sangutinneqassaaq imaluunniit assiaqutserneqassalluni, taamaalilluni qaammaqqutaa imaluunniit ikittaartartui takuneqarsinnaassanatik.

Angallanneq

- 45 Ujaqqat qaartiterinermeersut, ASN-mut nassuiaammi nassuiarneqartutut, taamaallaat ujaqquarvimmit Quassussuarmiittumit pissarsiarineqassappat. Ujaqqat qaartiterinermeersut ujaqquarvimmit allamit pissarsiarineqassappata imaluunniit sioqqat imaani isumalluutinit pissarsiarineqassappata, tamatumani suliaq allanngortinneqarsimassaaq, Nunalerinermut, Imminut Pilersormut, Nukissiutitut Avatangiisinullu Naalakkersuisoqarfimmut nalunaarutigineqartussaq.
- 46 Quassussuarmi ujaqquarvimmiit ujaqqat piiarneqartut biilnik aggiunneqarnissaannut angallannermik naliliineq sanatitsisup Nunalerinermut, Imminut Pilersormut, Nukissiutitut Avatangiisinullu Naalakkersuisoqarfimmut saqqummiutissavaa. Angallannermik naliliinermit

ilaatinneqassapput angallannerup ingerlaneranut sunniutaasussat aammalu aqqusineri attuumassuteqartuni angallannerup isumannaatsuunera.

Naliliinermi inerniliusseq tassaappat, ujaqqanik qaartiterinermeersunik angallassineq angallannerup ingerlaneranut aammalu angallannerup isumannatsuuneranut akuersarneqarsinnaanngitsumik sunniinermik malitseqartussaasoq, assartuussinerup ingerlanneqarsinnaalinnginnerani, naliliinermi iliuusissat iluarsiiisutaasussat atuutsinneqalertussat ilaatinneqassapput.

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfiup nalilersuineq akuerereerpagu aatsaat suliaasaq aallarteqqusaalissaaq.

4.3 Ingerlatsinermut atugassarititaasut

Atugassarititaasut nalinginnaasut

- 47 Sanaartukkamiit eqqagassanik passussineq inatsisinut atuuttunut aammalu kommuunip eqqagassalerinermut malittarisassaannut atuuttunut naapertuuttumik pissaaq.
- 48 Uulianik aammalu akuutissanik avatangiisiniittuunngitsunik passussineq uninngasuuteqarnerlu atugassarititaasunut 12-15-inut naapertuuttumik pissaaq.
- 49 Ingerlatsinerup immikkoortuani orsersornermi ikummatissanik biilini tankilinnik ingerlanneqaqqusaanngillat.
- 50 Kilisaatinut terminalip tamakkiisumik ilaannaasumilluunniit tunniunneqarnissaa, attartortinneqarnissaa imaluunniit allap ingerlatassaatur attartortinneqarnissaa sioqqullugu Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfik ilisimatinneqassaaq.

Qaammaqqusersuineq

- 51 Kilisaatinut terminali, qaammaqqusersuutit inngiasutsisusaaajunnaarlugit imaluunniit allatut avatangiisinut akornusiisusaaajunnaarlugit, aqqissuunneqassaaq. Qulleq najugaqarfiit tunutillugit sangutinneqassaaq imaluunniit assiaqutserneqassalluni, taamaalilluni qaammaqqutitaa imaluunniit qaammaallattaartui takuneqarsinnaassanatik.

Upalungaarsimanermut pilersaarut

- 52 Kilisaatinut terminalip atorneqalinnginnerani sanatitsisoq upalungaarsimanermut pilersaarummik suliaqassaaq, tassani sillimaniarnermi iliuusissat, uuliamik aammalu akuutissanik avatangiisiniittuunngitsunik

kuutsitsinermut kuutsitsisoormullu atatillugu pitsaaliuilluni imaluunniit killilersimaariniarluni aallartinneqartussat, nassuiarneqassapput.

Kilisaatinut terminalip ingerlanneqarnerata aallartissinnaalinnginnerani upalungaarsimanermut pilersaarut Nunalerinermut, Imminut Pilersornermut, Nukissiutitut Avatangiisinullu Naalakkersuisumut akuersissuteqarfigineqartussanngorlugu nassiunneqassaaq.

- 53 Kilisaatinut terminalip eqqaani umiarsuarnut uuliamik nuussisoqarsinnaalinnginnerani (umiarsuarmiit-umiarsuarmut-orsersorneq), upalungaarsimanermut pilersaarut Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut akuersissuteqarfigineqartussanngorlugu nassiunneqassaaq. Upalungaarsimanermut pilersaarutip akuersissuteqarfigineqannginnerani umiarsuarmiit-umiarsuarmut-orsersorneq ingerlanneqaqqusaanngilaq.
- 54 Tankeqarfiup 8.000 m^3 -inik annertussusillip atorneqalinnginnerani, upalungaarsimanermut pilersaarut, Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut akuersissuteqarfigineqartussanngorlugu nassiunneqartussaq, suliarineqassaaq. Sanaartugassaq upalungaarsimanermut pilersaarut akuersissuteqarfigineqaqqartinnagu atulerneqaqqusaanngilaq.

Nipiliorneq

- 55 Suliffiup nalinginnaasup avataani ingerlatassanut atatillugu, inissiat 40 dB(A)-mit nipitunerusumik nipiliornerit sunnerneqannginnissaat qulakkeerneqassaaq.
- 56 Ingerlatsinerup immikkoortuani suliffiup nalinginnaasup avataani saviminikunik usilersortoqaqqusaananilu usingiartoqaqqusaanngilaq.

4.4 Matusinissamut atugassarititaasut

- 57 Kilisaatinut terminali atorunnaarsinneqassappat, Sanatitsisoq, sanaartukkap atorunnaarsinnissaa kingusinnerpaamik ukiumik ataatsimik sioqqullugu, matusinissamut pilersaarummik suliaqassaaq.

Sumiiffiit kalluarneqartut qanoq qimanneqassanersut, aammalu pinngortitaq avatangiisillu matusinermut atatillugu kiisalu matusereernerup kingorna qanoq isumannaarneqassanersut, matusinissamut pilersaarummi nassuiarneqassaaq. Matusinermik suliaqarnerup aallartinnginnerani matusinissamut pilersaarut Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmi akuerineqarsimassaaq.

5 Atugassarititaasunut aalajangersarneqartunut tunngaviusut tunngavilersuutillu

Takussutissiami matuma kingulianiittumi sanaartugassamut matumunnga ASN-mik akuersissuteqarnermut tunngaviusut tunngavilersuutaasullu nassuiarneqarput. atugassarititaasunut ASN-mut nassuiaammi pitsaaliuinissamut iliuusissatut siunnersuutigineqartut aammalu tunngavigisat nassuiarneqartut, suliassami avatangiisinut sunniutaasussanik killileeqataasussat, aallaavigineqarput.

Aammattaaq ASN-mik akuersissuteqarnermi atugassarititaasunut piumasaqaatit arlallit, sanaartugassani ASN-mik pisussaaffeqarfiusuni ASN-mik akuersissuteqarnermi nalinginnaasumik piumasaqaatigineqartartut, aallaavigineqarput. Kiisalu tusarniaanermut atugassarititaasut tiguneqartut, oqartussanit allanit oqaaseqaatit imaluunniit ASN-mut nassuiaammi pissutsit malitsigisaannik atugassarititaasut, sanatitsisoq pitsaaliuinissamut iliuusissanik siunnersuuteqarani, kisianni Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfik naliliilluni avatangiisinut annertuumik sunniinerlunnissap pinngitsoortinnissaanut pisariaqartoq, aallaavigalugit atugassarititaasunik piumasaqaateqartoqarsimasinnaavoq.

Takussutissiaq 2: ASN-mik akuersissuteqarnermut matumunnga atugassarititaasunut ataasiakkaanut tunngavilersuutit.

Atugassarititaasoq nr.	Tunngavilersuut
1	Kilisaatinut terminalip sanaartorneqarneranut ingerlanneqarneranullu akisussaasuusup akuersissuteqarnerup imarisai ilisimassagai aammalu akuersissuteqarnerup imarisaannut naapertuuttumik iliuuseqarsinnaasoq, atugassarititaasumi qulakkeerneqassaaq.
2	Atugassarititaasoq piumasaqaatigineqarpoq, tassami akuersissuteqarneq taamaallaat sanaartorneqarnermut ingerlatassanullu ASN-mut nassuiaammi nassuiarneqartunut tunngassuteqarmat.
3-5	Suliassaq maannakkorpiaq sukumiisumik sanaartugassamut pilersaarusiorneqarsimanngimmat, ASN-mut nassuiaammi nalilersorneqartut tamakkiisuunerat qulakkeerniarlugu, sanatitsisup Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut pilersaarutit saqqummiutissavai, taamaalilluni suliaqarneq annertunerusunik misissuisoqarnani aallartinneqarsinnaassalluni.
6	Avatangiisinut pilersaarut pillugu atugassarititaasumi, sanaartorneqarnermut suliaqarnerup aallartinnginnerani ajutoortoqarnissaata /kuutsitsisoortoqarnissaata pinngitsoortinnissaa qulakkeerneqassaaq. Taamaakkaluartoq ajutoortoqassagaluarpat imaluunniit kuutsitsisoortoqassagaluarpat, peqatigisaanik sillimaniarnermi iliuusissat aalajangiiffigineqartussat isummerfigineqarnissaat, tamatuma peqatigisaanik avatangiisinut pilersaarummi qulakkeerneqassaaq, ilanngullugit ilaatigut ikummatissat, akuutissat uumaatsut, eqqagassanik igitsinissaq ateqqiniissarluni aammalu imikoorutit passunneqarnissaannut isummernissaq. Atugassarititaasut ASN-mut nassuiaammut naapertuupput.

Atugassarititaasoq nr.	Tunngavilersuut
7-11	Atugassarititaasut ujaqqanik aserorterivimmut immikkoortiterivimmullu avatangiisinut akuersissuteqarfigineqartussaataitaasumut piumasaqaatigineqarput. Atugassarititaasoq ASN-mut nassuiaammi ilanngussaq 4-mut naapertuuppoq.
12-16	Atugassarititaasut imikoorutip, eqqagassat, ikummatissanik assartuussinerup/uninngasuuteqarnerup immaqalu issup mingutsinneqarsimasup maleruagassat atuuttut malillugit passunneqarnissaat qulakkeerniarlugu piumasaqaatigineqarput.
17-26	Tankeqarfimmik annertuumik sanasoqassagalarpat, tamatuma avatangiisinut isumannaatsumik aammalu teknikkinit malittarisassat malillugit ingerlanneqarnissaa qulakkeerniarlugu, atugassarititaasut piumasaqaatigineqarput. Atugassarititaasut 18-26, ASN-mut nassuiaammut naapertuupput.
27-40	Naatsorsuutigineqarpoq qaartiterinermik suliaqarnerit sanaartornerup immikkoortuani annertunerpaamik sunniisussanut ilaassusaasut. Taamaattumik nunami aammalu immap iluani qaartiterinermut qaartiterinissamut pisussanut pilersaaruteqassaaq. Mingutsitsineq qaartiterutissanik ANFO-nik atuinerup kingunerisartagaa Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfiup akuersaanngilaa. Atugassarititaasumi 28-mi suliaassami ANFO atorneqannginnissaat qulakkeerneqarpoq. Atugassarititaasut 30-39, ASN-mut nassuiaammut naapertuuttumik qaartiterinermik suliaqarnerit ingerlanneqarnissaat qulakkeerniarlugu piumasaqaatigineqarput. Atugassarititaasoq 39 naapertorlugu alapernaarsuineq eqqortumik uppersaanissap qulakkeernissaanut ilinniarsimasumit ingerlanneqassaaq.
41-42	Sanaartorfiup sumiiffianut qaninnerpaami najugaqartut unnukkut unnuakkullu kiisalu sapaatit akunnerisa naanerini nalliuttunilu sapinngisamik annikinnerpaamik akornusersorneqarnissaat qulakkeerniarlugu, atugassarititaasut piumasaqaatigineqarput.
43	Atugassarititaasoq ASN-mut nassuiaammut naapertuuppoq.
44	Sanaartorfiusup eqqaani avatangiisini qaammaqqutinit mingutsitsinissaq annikillisinniarlugu atugassarititaasoq piumasaqaatigineqarpoq.
45-46	Ujaqqat qaartiterinermesut ASN-mut nassuiaammi nassuiaatinut nalilersuinemullu naapertuuttumik pissarsiarineqartarnissaat qulakkeerniarlugu, atugassarititaasoq 45 aalajangersarneqarpoq. Atugassarititaasoq 46, ujaqkerivimmiit sanaartorfiup sumiiffianut aqqusernit atorneqarnissaasa paasinarsisinneqarsimanissaa aammalu annertunerusunik misissuisoqarani suliaqarnerup aallartissinnaanissaa qulakkeerniarlugit, piumasaqaatigineqarpoq. Sanaartorfiup sumiiffianiit ujaqkerivimmut aqputaa Borgmester Anniitap Aqqusematigoorpoq aammalu Illerngit 2001-ikkloorluni, tamanna Nuummi illoqarfiit ilaasa akornanni atassusiisumik aqqusiniulluni aalajangiisuulluinnartoq qitiulluinnartorlu. Sanaartornermik suliaqarnerup aallartinnissaa maannakkorpiaq ilisimaneqanngimmat, taamatuttaaq aqqutissami oqaatigineqartumi maannakkut angallannermut tunngasut tunngavigalugit tamatuma pinissaa pingaaruteqarpoq.

Atugassarititaasoq nr.	Tunngavilersuut
47-50	Sanaartukkamut allilerneqartumut atatillugu imikoorutip, eqqagassat, ikummatissamik assartuineq/uninngasuuteqarneq immaqalu issumik mingutsinneqarsimasumik maleruagassat atuuttut malillugit passunneqartarnissaat qulakkeerniarlugu atugassarititaasut piumasaqaatigineqarput.
51	Kilisaatinut terminalip eqqaani avatangiisit qaammaqqutinit mingutsinneqarnissaannik annikillisisiniarluni atugassarititaasoq piumasaqaatigineqarpoq.
52-54	Kilisaatinut terminalimut, orsersornermut tankeqarfinnullu upalungaarsimanermut pilersaaruteqarnissaa qulakkeerniarlugu atugassarititaasut piumasaqaatigineqarput, taamaalilluni ajutoorneq pinngitsoorinneqarsinnaassalluni, aammalu uuliamik imaluunniit akuutissanik uumaatsunik kuutsisisoorortoqartoq paasineqarpat suliaqartinneqarsinnaasunik upalungaarsimasoqassalluni, taamaaliornermi kuutsisisoornerup annertussusaa tamatumalu sunniutissai annikillisinneqassallutik. Upalungaarsimasut kuutsisisoorortoqassagalarpat killilernissaanut katersornissaanullu atortunik pisariaqartunik il.il. atortulersorneqarsimassapput.
55-56	Kilisaatinut terminalimut qaninnerpaami najugaqartut unnukkut unnuakkullu kiisalu sapaatit akunnerisa naalerneranni nalliuttunilu sapinngisamik annikinnerpaamik akornusersorneqarnissaat qulakkeerniarlugu, atugassarititaasut piumasaqaatigineqarput.
57	Sanaartukkap matuneqarnera pillugu apeqqu ASN-mut nassuiaammi sammineqanngilaq, aammalu talittarfeqarfiup atorunnaarsikkiartuaarnissaa pilersaarutigineqanngilaq. Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfik naliliivoq, ingerlatsineq unitsinneqassappat, sanaartukkap matuneqarnissaanut pilersaaruteqartussaasoq, taamaalilluni sanaartugaq pinngortitamut, avatangiisinut nunamilu pinngortitamut pisariaqanngitsumik sunniisussaajunnaarlugu qimanneqarnissaa qulakkeerneqassalluni. Taamaattumik matusinermi sanaartukkamut matusinissamut pilersaarummik suliaqarnissaq pisariaqarpoq.

6 Allaffissornikkut aalajangersakkat

Kapitalimi matumani ASNmik akuersissuteqarnerup atorunnaarnissaa iluarsaanneqarnissaalu pillugit (§§ 24-25), kiisalu peqqusissuteqartarnerit inerteqquteqarnerlu pillugit (takuuk §§ 29-32) aalajangersakkat nassuiarneqarput, takuuk *atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marts 2013-imeersoq* (ASN-rnut nalunaarut).

6.1 Akuersissuteqarnerup atorunnaarnera

ASN-rnut nalunaarummi § 24, imm. 1 naapertorlugu, ASN-mik akuersissuteqarnerup nalunaarutigineqarnerata kingorna ukiut 4-t iluanni taanna atorneqanngippat, ASN-mik akuersissuteqarneq atorunnaassaaq. Akuersissut atorneqarsimassaaq, sanaartugassaq pilersinneqareerpat imaluunniit allanngortitsinissaaq aallartinneqareerpat, takuuk § 24, imm. 2.

ASN-mik akuersissuteqarneq nutarterneqassappat, ASN-mut nassuiaat tamanut ammasumik tusarniaassutigineqartoq (5. juli 2024 – 30. august 2024) suli tassunga tunngassuteqarsimappat, tassunga akuersissuteqarneq manna aallaavigineqarsinnaavoq, takuuk § 24, imm. 3.

6.2 Akuersissuteqarnerup iluarsineqarnera

VVM-inut nalunaarummi § 25 naapertorlugu, akuersissuteqarnerup kingorna ukiut arfineq pingasut ingerlareerneranni, tamanna avatangiisinik tunngavilersorneqarpat imaluunniit saleeriaatsinik pitsaanerusunik ineriartortitsisoqarsimappat imaluunniit tunisassioriaatsit mingutsitsinnginnerulersimappata, Nunalerinermut, Imminut Pilersornermut, Nukissiutinut Avatangiisinullu Naalakkersuisup nutaamik ASN-mik akuersissuteqarluni, tamatumunnga atugassarititaasut allanngortissinnaavai.

6.3 Peqqusissuteqarnerit

ASN-rnut nalunaarummi § 29, imm. 1 naapertorlugu, akuersissuteqarnermut atugassarititaasut unioqqutinneqarpata, taamaalilluni sanaartugaq Nunalerinermut, Imminut Pilersornermut, Nukissiutinut Avatangiisinullu Naalakkersuisumit annertuutut isigineqartumik mingutsitsinermik malitseqarluni, Nunalerinermut, Imminut Pilersornermut, Nukissiutinut Avatangiisinullu Naalakkersuisoq iliuusissanik iluarsiiisutaasussanik aallartitseqqusilluni peqqussuteqarsinnaavoq. Peqqusissuteqarneq nalunaarutigineqartoq piffissamut killigitiitap aalajangersarneqartup iluani malinneqanngippat, oqartussap peqqusissuteqartup, sanatitsisup akisussaasuusup akiligassaanik iliuusissaaq suliaritissinnaavaa, takuuk § 29, imm. 2.

ASN-rnut nalunaarummi § 32 naapertorlugu § 29, imm. 1 malillugu peqqusissuteqarneq aatsaat nalunaarutigineqarsinnaavoq:

- Akuersissuteqarnermut atugassarititaasut unioqqutinneqarpata.
- Mingutsitsinerup ajoqusiisumik sunniutai pillugit paasissutissanik nutaanik pingaarutilinnik saqqummertoqarpata.
- Mingutsitsineq avatangiisinut annertuumik ajoqusiisumik sunniinermik, akuersissuteqarnermi takorlooreerneqarsinnaanngitsunik, malitseqarpata, imaluunniit
- Mingutsitsineq akuersissuteqarnermut tunngavigineqartut qaangerlugit annertuneruppat.

6.4 Avatangiisinik nakkutilliineq

ASN-rnut nalunaarummi § 28, imm. 1 naapertorlugu, nakkutilliisut sumiiffimmi takusarneqartumi uninnganerannut immaqalu sumiiffiup sanaartukkamit sunnerneqarsinnaasup eqqaani assartorneqarnerannut atasut aningaasartuutit nalequttut tamaasa sanatitsisup akilissavai.

Nakkutilliinermut ilaatillugu Nunalerinermut, Imminut Pilersornermut, Nukissiutitut Avatangiisinullu Naalakkersuisup nakkutilliinerup annertussusaa nalilersortussaavaa, ilanngullugit peqataasut amerlassusaat sivilissusaaalu aammalu sanatitsisup tamatuminnga ilisimatinnissaa, takuuk § 28, imm. 2.

6.5 Akuersissuteqarnerit tassunga attuumasut

ASN-rnut nalunaarummi § 14, imm. 1 naapertorlugu, sanaartugassami matumani avatangiisinut pilersaarutip akuersissuteqarnerillu ASN-mik akuersissuteqarnermi matumani allassimasut suliarineqarnerannut akuerineqarnerannullu Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfiup aningaasartuutai sanatitsisup akilertussaavai, tassami taakkua ASN-mik akuersissuteqarnermi matumani pineqartunut ilaammata.

7 **Tamanut saqqummiussineq aamma naammagittaalliornissamut ilitsersuut**

ASN-rnut nalunaarummi §§ 22 aamma 23 naapertorlugit Nunalerinermut, Imminut Pilersornermut, Nukissiutinut Avatangiisinullu Naalakkersuisup uani www.naalakkersuisut.gl kiisalu nuna tamakkerlugu najukkanilu tusagassiuutini aalajangiineq tamanut saqqummiutissavaa.

Aalajangiineq Avatangiisit allanngutsaaliorneqarnissaannut inatsimmi¹ § 60, imm. 1 naapertorlugu, Avatangiisit Innarlitsaaliorneqarnissaat pillugit Naammagittaalliuuteqartarfimmut, Naalakkersuisunit pilersinneqarsimasumut, naammagittaalliuutigineqarsinnaavoq, takuuk VVM-inut nalunaarummi § 33.

Avatangiisit allanngutsaaliorneqarnissaannut inatsimmi § 60, imm. 2 naapertorlugu naammagittaalliorsinnaatitaapput:

- Aalajangiiffigineqartut
- Nunatsinni Nakorsaaneqarfik
- Kinaluunniit suliap qanoq naammassineqarnissaanut nammineq immikkut imaluunniit annertuumik soqutigisaqartoq
- Peqatigiiffiit suleqatigiiffiillu, malittarisassatik naapertorlugit nunanik peqqissarfiullutik qasuersaarfiusartunik, avatangiisinik pinngortitamillu annertuumik soqutigisanik isumagisaqarnissamik siunertaqartut

Naammagittaalliornissamut killigitinneqarput sapaatit akunneri 6-it, ulloq aalajangiinerup Avatangiisit allanngutsaaliorneqarnissaannut inatsimmi § 60, imm. 3 naapertorlugu nalunaarutigineqarnerata aallartiffia naatsorsorlugu.

Naammagittaalliuut uunga tunniunneqassaaq:

Nunalerinermut, Imminut Pilersornermut, Nukissiutinut Avatangiisinullu
Naalakkersuisoqarfik
Imaneq 1A
Postboks 1614
3900 Nuuk
E-mail: pan@nanoq.gl

Naalakkersuisoqarfiup tamatuma kingorna naammagittaalliuut najoqqutassanik suliap naliliiffigineqarnerani ilaatinneqartunik ilaqartillugu Avatangiisit Innarlitsaaliorneqarnissaat pillugit Naammagittaalliuuteqartarfimmut naasiutissavaa. Peqatigisaanik suliami naammagittaalliummik tigusaqartoqartoq, suliami pineqartoq paasissutissinneqassaaq.

Naammagittaalliuuteqartarfiup aalajangiineri allaffissornikkut oqartussamut allanut ingerlateqqinneqarsinnaanngillat, takuuk Avatangiisit allanngutsaaliorneqarnissaannut inatsimmi § 60, imm. 4.

¹ Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersoq

Avatangiisit allanngutsaaliorneqarnissaannut inatsimmi § 63, imm. 1
naapertorlugu, Naalakkersuisut allatut aalajangersimanngippata, tamat
naammagittaalliuutai piffissami, Avatangiisit Innarlitsaaliorneqarnissaat pillugit
Naammagittaalliuuteqartarfiup naammagittaalliuutaasimasinnaasunik
suliarinninnerani, kinguartitsinermik sunniuteqassanngillat.

Naammagittaalliornissamut killigititaq naatinngu, illuliornermik
sanaartornermillu suliaqarnerit aallartinneqaqqusaanngillat, takuuk Avatangiisit
allanngutsaaliorneqarnissaannut inatsimmi § 64, imm. 1.

Aalajangiinerup nalunaarutigineqareernerata kingorna qaammatit 6-it iluanni
aalajangiineq eqqartuussivinnut suliaqarsinnaavoq, takuuk
Avatangiisit allanngutsaaliorneqarnissaannut inatsimmi § 65.